

ASO LUA, 21 SETEMA 2021

Na toe faaauau Taulumaga o le Fono Aoao Faitulafono i le itula e 6:58 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2021/2022.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Faamalo le onosai i le paia o le Palemene, ua tatou tafai lagona le vaivai, ae momoli atu le faamalo i lo outou onosai. O lo o faafofoga tapuai mai pea Samoa i le feagai ai o le Palemene ma Fonotaga, ae faafetai o lo o mau pea le toovae ma o lo o maua pea le faatoatoa e le paia o le tatou Palemene. E manatu ua maua le malosi faaopoopo e toe faaauau ai le tatou galuega.

E faataatiaese Taulumaga a le Fono Aoao Faitulafono ua maea ona saunoa le sui usufono mo Anoamaa Nu.2 po o le Sui Taitai foi o le Itu Agai. A o le avanoa leni mo le sui usufono o Lepa, ia po o le Taitai foi o le Itu Agai.

Ia lau Afioga i le Taitai o le Itu Agai.

Susuga Hon TUILAEPA FATIALOFA AUUEA SAILELE MALIELEGAOI: Ou te faamalulu atu i lau Afioga ua ou matauina ua e vaivai, a o lea ua atili ai ona malosi le tino i le malulu o le fale. Ae ou te tulai atu ma le agaga faaaloalo i leni itula afiafi o lea ua maea saunoa sui usufono o leni foi Vaega Faaupufai e momoli lo latou sao aua le faamoemoe maualuga ua tatou Fonopo ai i le talanoaina o leni Tala Autu o le Tupe mo leni foi tausaga faaletupe fou.

Ma a o le i faia sau upu, e i ai lava sina ou tau matamuli teisi, ona a ou talanoa loa i le Tala o le Tupe faapea foi ma le lauga, ua ou tau tei po o ai na tusia le lauga, ona e pei e galo i le tusi lauga, a talanoa loa i le tausaga talu ai, o lea e talanoa ia maua ma Fiamē. E faitioina loa la le Malo, ia ua faitio foi ia Fiamē ma au, ona o foliga o le tulaga o le tamaoaiga, o foliga lava lea sa matou fai faaiuga ai ma folau ai Samoa mai lena tausaga seia tau mai i leni tausaga.

Lau Afioga i le Fofoga Fetalai ma le mamalu o le Maota, se i avatu lava sina vaaiga puupuu i le tatou atunuu ma le tamaoaiga, o se atunuu toafilemu,

stable. O se atunuu e taualoa, o se atunuu na muaimalae i upufai o Malo. Ma a oo loa ina feiloai Taitai o le Pasefika e aofia ai ma Niu Sila ma Ausetalia, e aumai lava le latou faaaloalo ia Samoa ona o le tulaga matua o Samoa i le saofaiga a Malo o le Pasefika. E faapena foi pe a feiloai auai tatou i le feiloaiga a atunuu o atumotu laiti, ia po o atunuu foi o Europa ma Aferika, Karepeane ma le Pasefika ona o Samoa sa i ai lava i le amataga i le tausaga e 1975, ina faatoa faatu le ACP, ma o ina foi e atagia ai le maualuga na oo i ai Samoa i le tapenaina o mataupu uma e avatu i fonotaga a Malo i le maualuga na oo i ai pe ua o oi ai le aufaigaluega a le Malo i a latou fautuaga tuusao ma le tapenaina o mafaufauga e tuuina atu i Fonotaga e oo lava i Fonotaga a Malo Afaatasi. Ma e saili mai foi i le tatou Malo le tofamamao i le tulaga o faaiuga fai ma le taumafai o Malo e puepuemaua le tulaga maualuga ua i ai Samoa, e faavae ai foi a latou fuafuaga lautele e fesoasoani mai ai i atunuu o lo o tauatiae. E faapena foi i fonotaga a Minisita o Tupe o le Lalolagi, World Bank, e faapena foi le Asian Development Bank ma le IMF. E pei e agai mai lava ia Samoa le maualuga o a latou faaaloaloga ma tapa ai se finagalo o Samoa i le tele o mataupu e moomia ai se sao o Malo i fafo i le atinae o atumotu laiti. O le ala lena na ala ai ona usu mai le fono a Malo Afaatasi iinei i le 2014, sa mana'o foi Fiti latou te avea le avanoa, ma o lea foi ua toe tumalo tatou i le talimalo i le fonotaga a Malo o Aferika, Karepeane ma le Pasefika. Ua uma le faatalanoaga, a o lo o faatali nei le sainiga o le feagaiga. E faapena foi ma le tulaga o le talimalo a Samoa i le fonotaga a Faauluuluga o Malo o le Taupulega e 54 atunuu, ua uma ona fai faaiuga e pei ona matou feiloai ai i le fonotaga sa faia i Lonetona.

O se tala puupuu lea i le aloaia o le Malo lenei o Samoa aemaise ona taitai. O le itu foi lea e ala ai ona naunau mai le tele o fesoasoani o lo o tatou maua, e le gata mai Faalapotopotoga o Mea Tau Tupe a le Lalolagi, ae faapea foi ma Malo, o tatou paaga o Ausetalia, o Niu Sila, faapena foi Saina, Iapani, o Kanata, ia ma nai fesoasoani e maua mai i le malo o Amerika.

O tulaga ia taualoa, ou te manatu e agai i ai se leo. I le faatoa tutoatasi o Samoa, na tuu ai tatou i le lisi o atunuu aupito maualalo le tamaoaiga, o atunuu ia e i lalo ifo o le \$100 Amerika a le aiga e maua i le tausaga. E fai lava si tele o atunuu o lea e lavea ai i i le category lea o mea o atunuu e maualalo le tamaoaiga po o atunuu matitiva. Peitai, i le tuputupu ae o le tamaoaiga i le fua lea i le GDP, o lona uiga o le Gross Domestic Product, o le fua lea e fua ai tupe maua tuufaatasi a tagata uma o le atunuu ma tuputupu ae pea. Ma o le taimi lenei ua sili laitiiti atu i le \$10,000 a le tagata, income per capita i le tausaga. O i tonu lava na ala ai ona le mafai le mafai ona tatou toe tutumau ai i le lisi o atunuu ia matitiva o le lalolagi, ua maualuga tele fuainumera o tupe maua a le atunuu ua silia ma le \$2 piliona i le tausaga vaevae i le aofai o ona tagata ona maua ai lea o le per capita income po o le fua lea o tupe maua a le tagata e toatasi. Ia ona ua pau lava o le fua po o le faailo e fua ai lea atunuu i lea atunuu. Na ausia e tatou le tulaga lena i le

tausaga e 2010. Faapea lava o le a see ese loa tatou mai le tulaga lea. Sa le fiafia i ai matou i lenei taimi ona o le popole, see loa i luga Samoa, e ono le toe maua e tatou faamanuiaga, faamanuiaga o seleni faameaalofa. E le gata o meaalofa ae faapea foi ma vaegatupe e nono mai i se tulaga mama, e toe totogi i le 30 tausaga maximum. Up to 10 years, 10 tausaga e le toe totogia ai se tului. Ma o le tele lava o nei foi poloketi po o atinae tatou te faia, e 2 i le 3 tausaga o tapena, tapena e le aufaigaluega a le tatou Malo ua matua lava taoso i le tapenaina o mataupu uma o lo o moomia e Faalapotopotoga nei Faava o Malo. A maea loa ona tapena ma pasi, e oo foi i le 3 i le 4 tausaga o faagasolo le faatinoina o le poloketi lenei. A oo loa la ina maea ona gaoioi loa lea o le poloketi lenei e toe totogi le nogatupe, aemaise lava pe a faapea e umi le taimi faatoa amata ona togitogi. O lona uiga la, e amata ona gaoioi le poloketi e totogi le nogatupe a o lea e le i oo i le taimi e amata ai oma totogi le nogatupe faasolosolo mai tausaga e tele.

O le tulaga lenei o lea sa tatou entitle i ai, ona oo loa lea i le 2014, ua graduate loa tatou ua siitia le tulaga o le maualuga o le tamaoaiga ia Ianuari 2014. O le tausaga foi lenei na usu ai le fonofono a Malo Aufaatasi i nei i Samoa. Ma o le isi lea mataupu sa ou faalauaitelina i Malo uma sa i ai i nei, o fua ia o tou seleni na aumai, lea ua maualuga ai le tamaoaiga o Samoa, lea la e sosolo ai i le taimi lenei. E oo mai la faafitauli ia e faafeagai ma tatou, o afa, o Tsunami o mea faapena, a ua lava tapena tatou i le tulaga lea ua lava ma ua tele a tatou atinae ua faatino e gafatia gofie ai onafofo faafitauli tetele e feagai ma Samoa.

Ua ou taua le tulaga lea lau Afioga i le Fofoga Fetalai, ona o le itu lea o le stability po o le toafilemu o se atunuu, o le atili foi lenei ona tosina mai turisi ma latou e i ai tupe e invest e faaalua i nei i Samoa ma maua ai galuega a tatou fanau. O le itu taua tele lenei i le tulaga o le toafilemu o tatou faigamalo.

Lau Afioga i le Fofoga Fetalai, ua ala ona ou taua itu ia, ona o le taua tele ia i tatou o taitai o Samoa. I le tofia ai o tatou tatou te omai e faatino o tatou tiute o auauna a Samoa, e le mafai ona faagaloina le tulaga lea. O a tatou gaoioiga e fai, e pue uma lava e a tatou paaga i fafo lea e i nei o latou ofisa, latou te puea ma ave i fafo ma faasalalau atu i le lautele o atunuu i fafo le tulaga o lo o i ai le tatou Malo ma le taimi lea tatou te i ai. O le faataua foi lenei e le Vaega lenei lona sao, e taumafai foi e fai lana pitolaau ina ia faatoafilemu le tatou atunuu i le tulaga lea na tulai mai. Ia ona o tatou lava foi faiga faapolokiki. Ae o le itu taua i le matau mai fafo, e leai lava ni faalavelave e tutupu. I lenei fia masina, e le o vaai mai o fetauai le atunuu lenei. O mea ia e faataua tele, aemaise le alu atu o le tala, o Samoa o le isi le atunuu po o le atunuu lea e malosia tele lana aganuu, e le gata ina pulea e matai, e faatoafilemuina le nuu, ae o lo o faalagolago foi i auauna a le Atua, o latou o taitai faaleagaga e lauga ma Afioga a le Atua ia nonofo fealofani fanau a le Atua. Ua ou manatu e amata ai i ina lau tautalaga, e taua tele ia te au ma le Vaega lenei, ou te manatu foi e faapena lenei itu, ia tatou pipii pea

i le tatou Faavae. E i ai taimi tatou te feeseeseai ai, a ia faatumau i o tatou manatu, a vale tuulima le faatuatuaga o le atunuu ua aumai ia i tatou, o le iuga e iu i ai, e fifi i luga o a tatou fanau faaletonu e tulai mai. O le mea lea, tatou uma lava, e le mafai ona tuuaia se vaega, a o tatou uma lava e i ai le sao i totonu i le tatou taumafai e fai lo tatou sao, faatoafilemu ia lo tatou atunuu.

O mea ia na tutupu ua uma ona oo i ai upu ma ou te manatu foi tau ia ina ou faapea atu, e pei ona saunoa le Fofoga Fetalai, faatupu manatu ia i tatou aua lo tatou agai atu i le lumanai. Avea ma taiala ina ia maua ai ia manatu fou. E i ai le muagagana e masani ai tatou, o mea e tutupu e toe tutupu foi.

O lenei lava vaega, o se popolega lea i ai matou ina ne i te i foi ua tulai mai ia se Pulega foi po o se Faigamalo a le HRPP i le lumanai ona faapea lea, tatou faataitai i ai i le faiga lea, e le lelei. Ma e ia i tatou lau Afioga i le Fofoga Fetalai ia le tiute, e tatou te tatalo ai foi aua ne i galo ia i tatou, o lo o Afio foi le Atua i le mea nei. O le manatu maualuga, afai o le Atua e faavae ai le Malo o Samoa, o lona uiga, o lo o Afio foi i le mea nei, e lagolago mai i o tatou manatu, ina ia o tatou manatua pea, ia le agalelei mai o lo tatou Alii. O le atunuu lenei o le atunuu faamanuiaina.

O le mamalu la o le tatou atunuu ma le mamalu o le Palemene, o lea e i o tatou lima. E i ai lava sina tuualalo i le Minisita o Leoleo, e talanoa pea ma Faauluuluga o Leoleo, ia faateete i le soona faaaoga o le malosi faaleoleo. O le aso lea na o matou matauina ai, ua matua le talafeagai le tamomoe atu o leoleo ma nei talita uumi. E oo foi i le taimi sa o matou feiloai ai, i le tulaga o le tapatapa atu i nofoa, tapatapa atu i vai, ae na o matou faalogoina lava le leo, tuu ai pea, e faifai lava fati toe vave o. E le o ni aga ia a lo tatou atunuu e masani ai.

O lau la tuualalo i lau Afioga i le Minisita, e taua tele ia te au ia lau faaaliga lea na fai i le taeao nei. O lo o i leoleo lava le malosi. Ou te popole ne i te i ua faaaoga se malosi faa-Minisita, ae ou te faatuatuaina lau Afioga, ona o oe o le Loia. Sa e faamasino foi, e te malamalama foi ia te au. Leva na o ta faifaimea faatasi i le Iuni Lakapi, tele foi mea sa e tatalo mai ai ia te au, ma ou lagolago atu ia te oe. O le taua o itu ia, aua ne i tuua ia a tatou taleni, mo le faatinoina o le amiotonu. Leaga o lena e te malamalama lelei, e le gata ina faatino le amiotonu, ae ia o tatou taumafai foi e ola i le amiotonu. O mea la ia na tutupu, ia ua faatea i nuu le aina lau Afioga i le Fofoga Fetalai, avea ma taiala mo tatou ia aua ne i toe tupu mai i le lumanai.

Ona ou oo mai lea i le tulaga lea o le faatinoga o galuega, e le mafai ona galo ia te au. Sa ou matamata ma ou faalogologo i saunoaga foi a le Sao Faapito. E faataua ai ia tatou faiga faa campaign, ia le Good Governance, Good Governance, Faigamalo lelei. Ia ou te talitonu, o la e saunoa Fiamē e malamalama lelei i mea ia, aua o mea ia sa limataitaiina ai ia le Kapeneta. Ma o Faigamalo lelei, e tolu lava ia mea e limataitaiina ai. 1. Ia manino lelei ia faaiuga aua ne i i ai ni mea e faalemanino. 2. Ia manino foi taiala e faatino

ai ia gaiouga uma ina ia taulau o faamoemoe. 3. I se tulaga lava o ni mea tetele ma ni faaiuga tetele, ia maua se avanoa e soalaupule ai ma tagata lautele.

E tolu mea na e tetele o Tulafono na o le Good Governance, Transparency, Accountability and Consultation. A atoa mea na e tolu i se Malo, ona iloa loa lea faaiuga o le a fai, e leai lava se mea e faitioina ai. O lau tuualalo na i faaiuga fai, a le Malo lea sa faalauaitele, e mulimulitai i le Good Governance Principles e mulimulitai ai.

O le tulaga taua o le faatinoga, o mea nei o Faigamalo lelei, o le itu lea o faaiuga. Afai e aafia ai se tagata i se faaiuga, o le mea e pito sili ona taua, ave i se vaega, se komiti po o latou e faia fautuaga ia aua ne i i ai se piitaga. Independence, ia aumai ia le fautuaga, e le o ni tagata e i ai so latou piitaga, ona taunuu ai lea o le tautinoga faale-Tulafono, e le gata ina faia ia le amiotonu, ae ia olaina foi ia le amiotonu, fai le amiotonu ia vaavaai mai tagata o fai. Ia faapena foi i le mea lea o le tauofo, ona o lea ou te vaai, o lea e i ai ia vaegatupe tetele ia e i totonu o le paketi, ina ia aveesea ia le masalomia, e tai pei o le vaega lea o fesoootaiga mo aoga. Aveese le masalosalo, ia faalauaitele ona tauofo. Aveese ai le masalosalo o i ai ni mea faaletonu o tatanu i lalo, o le tasi lena tuualalo e aofia ai ma latou foi o konesale lea o le a tatou talanoaina auiliili faakomiti.

O le itu taua lena e na ona ou pai puupuu i ai, ao lo o ou manatua ia le itu lava lena ia aemaise ua leva le afiafi. O le taumafai lea e aloalo ese ma le toe lagalaga o ni manatu, ae pau lava le mea lau Afioga i le Fofoga Fetalai o le auala lea e avatu ai ia le matou fesoasoani. Ave i o i le Malo ona o le isi lea mea matautia dangerous. O le mea matautia, o le nofo o ni taitai ma liolio latou e ni tagata e avatua ni mafaufauga e ioe i taimi uma i mea ia e manao ai ia Taitai.

O tagata e pito sili ona maua atu ai le tonu sao, o tagata e i ai o latou atugaluga. E le talafeagai le mea lea ma le mea lea. The most dangerous thing to do is to surround yourself with yes men and women. They will never, never, never give you the correct advice that should guide you to reach conclusions and decisions that are honest and will give you respect by the people who will be interested in what the Government is doing.

O le itu taua o le Paketi lena lau Afioga i le Fofoga Fetalai, o lea ou te matau i le faamuamua o lo o ave i ai ia le faataua i le Tala o le Tupe. O lea ia i le saunoaga foi sa fai, o lo o faataua le soifua lelei. In English we are talking about the question of Social Development. Saunoa ia Fonotoe, Economic Development and Social Development must be given an equal priority. O lona uiga, ia tutusa le faataua o mea ia e lua. Aisea? Ona e faalagolago social development i atinae e maua ai seleni e uunai ai ia social development.

O le faataitaiga, a tatou talanoa i le soifua lelei o tagata, in English i le tulaga faa-Peretania, o lea e tatou te talanoa i aoga, 2 tatou talanoa i le soifua

maloloina ia ma taaloga. O mea ia e 3 lea e masani ona faataua e economic planners. I taaloga, e faapefea ona lelei taaloga pe a le lava ia atinae e faatino ai taaloga? O ni malae ma ni fale taaalo. O le fetauiga na o mea nei e 2, relationship between the two, e matua manaomia ma auala faatino ona faigofie lea ona faataunuu le vaega lea o le social development. Ia e masaga la mea ia e lua. Afai la e te lilifa tele i le isi ae faatuatuanai le isi, e le mafai ona tau lau o le faamoemoe.

O le tulaga la lenei, i se manatu puupuu i le faataua lea e aumai i le lauga e tatau ona balance. E tatau ona paleni ia le Economic and Social Development. O le itu taua lau Afioga i le Fofoga Fetalai, ou te faatepa lava le mamalu o le tatou Maota nei, aemaise lava ia sui usufono ia faatoa tulai mai i le Maota, o le ata atoa o le Tala o le Tupe lenei i le tusi mafiafia, ae e taua tele le itulau Roma 1. O le Roma 1, lea e taoto mai ai le ata atoa lava lea o le seleni, ona vaevae loa lea i Matagaluega eseese lea e sau mai i tua. Ma e mafai ona faapuupuu atu faapea. I le faapuupuuga lava, o le Paketi atoa lava, o le tausaga i le tulaga lea o tupe alu, e \$982 miliona. Tupe maua fuafua, e \$876 miliona. O le faasiliga la e deficit, o lona uiga o lea e faaalu e isi fai mai o tupe pau, ua ova mamao atu ia le tupe faaalu, na i lo tupe maua. E \$106 miliona ia le ova, ona toese loa lea o le \$2 miliona, a silasila i le itulau 16 faa-Roma, e taua tele le itu lea, o na e tau mai ai, ia le \$2 miliona. E na o le tasi lava ia le loan na e i ai, o le loan mai i le Faalapotopotoga a atunuu o lo o maua ai le suauu.

O le tausaga e 1997 sa o matou feiloai ai, ma aumai ai ia le nonogatupe muamua. O le agaga o le nonogatupe lenei, e fau ai ia tatou tane suauu tausaga 1997. Na ala ona maua ia le mafaufauga i ina, ona o le mea na tupu i le tausaga e 1984. Na matua oti ai ia le tatou economy i le amataga mai lea i le 1981, 1982, 1983, 1984. Na matua sioti ai le suauu tender lea na o le tasi, o se faaitaiga lea la na maua ai e le Mopili le Tauofo, maua ai ma mafaufauga e tatau ona fau e tatou, ia tane e teu ai le suauu, ina ia mafai ai ona faataugofie ia suauu.

Sa matou feiloai ai ma le OPEC aumai ai le nonogatupe e \$5 miliona Amerika i le tausaga e 1997, lea la na fau ai ia tane tetele lea e i ai nei, ae o lea la ua toe aumai ia le isi nonoga tupe, ua le lava ia tane suauu o i ai, aisea? Ua tele naunau ia vaa ia e omai aemaise ia vaa ia fagota, matua maoae lava ia le manaomia o le suauu mai i fafo, o lea la e manaomia ai le tele o tane. E na o le tasi lava ia le nonogatupe e \$2 miliona ona uma lea.

A tilotilo ifo i lalo, lea e i ai le nonogatupe e \$6.4 miliona, ua uma i le 2020, 2021, tupe na na aumai mai i Saina, e faamaea ai ia le tatou airport. E aumai loans faa-multiple Trances lona uiga e aumai faasolosolo. Na ala la ona tuai ona faauma le nonogatupe lea, ona ua uma ona fau le terminal po o fale faatali pasese ae toe faatali mo auala savali, e le mafai foi ona fau ia auala savali, seiloga e uma lona fau ia faavae e tutu ai vaalele, ae faatupe mai e le faletupe o le lalolagi.

O ituaiga mea la faapea, e i ai le taimi e alu faatalanoaga, ia ona faatoa tatala mai lea o seleni ae sau faasolosolo. E tusa la ua 7 tausaga, e le i toe faia ia se tatou nonogatupe fou, ae sa faasolosolo ia le faaaogaina, manatua foi le falemai, tele tausaga na fau ai ae tasi lava le loan na fai.

O le tulaga la lena ua ou taua ia le itu lea, ona e fai si lavelave o mea nei o faatalanoaga, ma faletupe e aumai ai seleni e faatino ai galuega, 2, 3 tausaga o talanoa. A maea loa, ia ona agai atu loa lea i isi galuega e amata faatino o le ala lena e tatou te matua faaeteete, ona e le tele se tatou tupe maua mai. O le ala foi lena e tatou te matua faaeteete ai, i le faatinoina o tatou tupe alu mai tatou lava seleni mai lafoga, ona o lenei, e na ona logo lava o latou o donors, ua i ai se faaletonu, taofi loa ma fesoasoani. O lea sa fesili mai ai le Afioga i le Sao Faapito i le fonotaga talu ai, po o le a le mautinoa o nonogatupe lea mai i fafo? O lau tali, a ou nofo mai i o, ae saofai mai Fiamē, o lau tali, e mo mea o fesoasoani nei mai fafo, e leai lava se mea e mautinoa iinei, e na ona sipa lava o tatou ua faaletonu ia le faatinoga, po o ua i ai ni a tatou fuafuaga, e le talafeagai ma principles o le Good Governance, tipi motu loa e latou ona e i ai le mea na tupu. O le mea na tupu na manao le Malo e fai le...

Afioga Hon Fiamē Naomi Mataafa: Lau Afioga i le Fofoga Fetalai...

FOFOGA FETALAI: Fai sina au malologa lau Afioga i le Taitai o le Itu Agai, ia ae se i saunia ia le Afioga i le Palemia. Fai sina au malologa.

Afioga Hon Fiamē Naomi Mataafa: Ua matau atu ua silia i le 30 minute le saunoaga a le Taitai o le Itu Agai. Ou te faatu le lafo, *ina ia faaopoopo ia le taimi o le Taitai o le Itu Agai*. E taua foi lana saunoa mai, e momoli mai foi lana fesoasoani mo matou. Ia se 15 minute e faamolemole o le lafo lena.

FOFOGA FETALAI: Ua faatuina le lafo.

Faaluaina le lafo e le Afioga i le Sui Palemia ma Minisita o Faatoaga ma le Minisita o Galuega.

Na tuuina atu le maliega autasi a le Maota i le lafo.

FOFOGA FETALAI: Faaauau mai ia le saunoaga.

Susuga Hon TUILAEPa FATIALOFA AUELUA SAILELE MALIELEGAOI: E ala la ona ou talanoa atu i tulaga ia ona o si au tuualalo i le Kapeneta i tatou galuega tetele ia ua uma ona galulue i ai le afaigaluega a le Malo. E i ai le \$100 miliona le poloketi tele lava lea e taofi ai le lolovai o Apia ma Vaisigano o le mea muamua lena. Lua, o le maua ai o le suavai

faaopoopo, o lo o manaomia e le talafatai i Apia. Tolu, o le tulaga e toe maua ai se isi malosiaga tau eletise.

E i ai nai tagata e toaitiiti e tetee i ai i i, e lagolagoina ia le tou vaega, ae e tele atu ia le tou ai e maua i i i le faatinoina o le poloketi lena, aemaise o galuega tetele aua o tupe uma na e sau, e goto uma i ina i taga a le tatou aufaipisinisi, aemaise ia latou ia, o konekarate ia e lagolagoina le FAST. Ua ala la ona ou fai atu i i, e taua tele ia galuega sa faatino, ia outou alolofa, aua le taofia mo le manuia auiluma, o lo tatou atunuu. E le faapea e tau ai le HRPP, ia ona faapena ai lava lea ma taofi. O le mau lea faa HRPP na matou omai a i ai se isi mea lelei na fai e le isi Malo, faaauau, aisea? aua e manuia ai ia le atunuu, manuia ai outou, ia e manuia ai foi matou.

O le ala lena o lea e matou te naunau ai, ma avatu ia le matou tuualalo, ia outou alolofa i poloketi nei, aemaise o la e faatupe i grant. O tupe na, e le toe maua e tatou. O le anoano o isi mau atunuu lea e tilotilo i i, ae e talu ai e alu atu loa tatou ua leai, apo loa e isi atunuu. E tatou te o atu i ai masalo po o le fia sefulu tausaga e le toe aumaia, ae e tele le fesoasoani i lo tatou atunuu.

Lau Afioga i le Fofoga Fetalai ona ua le talia ia le lafo na faatu, ae e tele lava ia lo matou agaga, e fesoasoani atu i le Malo i le alofaiva aemaise lava tulaga o le aufaigaluega, ia o le tatou aufaigaluega ua lava taoso i le faatinoina o latou galuega, ia ma le tulaga lea o consultants, e toe silasila pea i ai.

Sa ou faitau i le lauga, e i ai ia Forensic Auditors o lea ua outou manatu, o ituaiga okika foi lea e manaomia, o le a foi alii le igoa o le okika? Forensic auditor. O lea ou te manatua na i ai le tatou Budget, na aumai po o le 7 i le 8 tausaga talu ai. E i ai ma le tulaga lena, o tatou Forensic auditors e ave ia latou courses. O lea ou te manatu nei pe ova ma le 20 ia Qualified Forensic Auditors, o lo o i ai i le tatou Malo. E le qualify ai ni okika mai i Niu Sila ma Ausetalia ona o le poloketi lea na fai sao lava i Amerika. E pei o le tuualalo lena, se i silasila ane i ai i te i ua maumau nai a tatou seleni, ae o lea e matou te iloa, e tele lava ia le tulaga, e tatau ona fesoasoani ai i le Minisita o le Tupe i le tau faasoasoa o nai a tatou seleni utiuti,

Ia lau Afioga i le Fofoga Fetalai, ia e pei o nai vaega na sa ou fia talanoa ai i lenei afiafi, ia aemaise foi o lea e tatou te agai atu e auiliili ia vaega taitasi o le Tala o le Tupe, ia o le a toe maua ai nisi avanoa i ina, e toe avatu atili ai ia le matou sao. Ae momoli atu le faamalo i lenei afiafi i le tatou Fonotaga, e tatou te manao uma ina ia folau i lagima ia lo tatou sa i lenei foi Paeaiaga. Ia soifua ma ia manuia.

Na faaalua le agaga fiafia o le Maota i le patipati o latou aao i le maea ai o le Saunoaga a le Taitai o le Itu Agai..

FOFOGA FETALAI: Ia malo le tanoa, faafetai foi saunoa i lau Afioga i le Taitai o le Itu Agai, o le foi sa tu i le foe i le tele o tausaga. E talitonu foi

i lau faasoa i le tuualalo o lea lava ua lagonaina gofie e lo tatou Maota. Ia aemaise foi ia le faalogologo atu a le Palemia ma le Kapeneta, aemaise foi o le soifua tautua ma le soifua auauna i le tele o tausaga o lea ua taua. Ua taua foi lou tulai mai i le Itu Agai, ia a lea ua aumai ia fautuaga lelei ma fautuaga talafeagai, ia aua lava le agai i luma o le tatou atunuu.

Ia faamalo saunoa, faafetai foi tofa, o lea ua manino auofala aua ia le faamoemoe ia aemaise foi o le lagolagosua ma tapeleni ia le Tala o le Tupe, ia o le faanaunautaiga lava o le manuia lautele o si o tatou atunuu ma le tatou galuega fai. O le mea faamalo tanoa faafetai tanoa. Ia talitonu o lea ua uma ia tatou lauga o le tatou Tala i le Tupe. Ia ae o lea ua o tatou see atu i le Palemia ma le Kapeneta ma le Malo, ia o lea ua maea saunoaga a sui usufono mamalu, ia ma ou te talitonu o le taimi lenei ia, lafo atu ia i le Afioga i le Taitai o le Malo, ia mo le faasologa o tali a le Malo i mataupu sa laga e sui usufono mamalu.

Ia tapa lau Afioga i le Palemia le Taitai o le Malo.

Afioga Hon FIAME NAOMI MATAAFA (Palemia): Faafetai lava i lau Afioga i le Fofoga Fetalai, ia e tulai atu i lenei itula, ou te lagona foi ua umi lenei aso, o lo o galulue ia le Maota o le atunuu. E momoli tu ia le faamalo ma le lava onosai ma le usufono, ia aua foi ia le faamoemoe o le faasolo lea o le Tala Autu o le Tupe. Ou te faafetai tele ona o lea ua faamaea ia saunoaga a sui usufono mamalu o le Maota, mai i lona vaiaso sa saunoa ai ia sui usufono o lenei foi itu o le malu. Ia ma le mea taua, o lea foi ua maea ia saunoaga ma tuleiga o lona itu o le malu.

Faafetai mo finagalo faaalua, e tusa ai ma le Tala o le Tupe, aemaise ai foi ia le ofoina mai o finagalo e tusa ai ma le Tala o le Tupe ua taatia nei i le Laulau a Fono, ia ma ni tuualalo taua.

Lau Afioga i le Fofoga Fetalai, e tusa ai ma faasologa o le tatou galuega, o lea ua mea ia felafolafoaiga, i saunoaga a sui usufono, o le a faasolo atu i le itu lenei a le Kapeneta, amatamea atu, ona faapea ai lava lea ona faasolo atu se i uma i le Minisita mulimuli. Ona tatou faagasolo atu ai lea i le auiliiliga o le Tala o le Tupe e pei ona masani ai.

E le tele nua ni mataupu sa laga mai e afioga i sui usufono e tusa ai ma Matagaluega o lo o i lalo o lau vaavaaiga.

Ae ou te le i tali atu i nisi o mataupu sa laga mai. Sa ou manatu lau Afioga i le Fofoga Fetalai, e taua ae fai si na au faamatalaga puupuu, i le itu sa tapena mai ai le tatou Tala o le Tupe, aemaise foi o le tulaga uiga ese o le faasologa mai o lenei foi Paeaiga. Atonu ou te le tau faamatalaina.

Lau Afioga i le Fofoga Fetalai ma le mamalu o le Palemene, i le ulufale mai o le tatou Faigamalo fou. O le tasi lava lea itu muamua sa silasila i ai le Kapeneta, o le tapenaga lenei ua tatou fonu ai. ona o lea sa taatia i se tulaga le mautinoa le faaogaina le faagaioiga o tupe a le Malo i tulaga masani.

Sa matou fia malamalama foi i le aiaiga sa faaauau mai ai le faagaioiga ole Malo mai le aso 1 o Iulai mai le taimi sa o matou ulufale atu ai ma faaauau le pulega faale-Malo.

Atonu e taua foi e pei ona malie i nisi o saunoaga, o tulaga fou pe o ni mea ua aliae mai i lo tatou Paeaiga lenei. Na matou fia malamalama i le tulaga sa faagaioi mai ai tupe. Ma atonu o lea sa i ai se saunoaga a le Afioga i le Taitai o le Malo talu ai. E faasilasila nisi o aiaiga, ae i le matou pale atu, aemaise o le matou feiloai ma le Matagaluega o le tupe faapea ai ma le Ofisa o le Loia sili aemaise o le Ofisa o le Suetusi sili. E pei o lea sa maua ai se atoatoa o fuafuaga sa fai, e faaauau mai ai a tatou tupe e faagaioi ai le Malo.

Sa i ai lo matou manatu lau Afioga i le Fofoga Fetalai, a ulufale atu le Faigamalo fou, i le matou vaavaai po o a aiaiga e mafai ona faagaioi ai ia tupe a le Malo. Sa i ai so matou manatu i le vaega 95 o le Tulafono Faavae. O le vaega lea 95 o lo o i ai le aiaiga foi lea. A faapea ua le mafai na faataatia ma faagasolo se tala o le tupe i le taimi e tatau ona faagasolo ai i totonu o le Palemene, ona i ai lea o le aiaiga e faaauau i le 25% o le tala o le tupe ua tuana'i.

O le vaega lena e 95 o le tulafono faavae sa i ai se manatu o le a faapea ona matou ulufale atu ona faagaioi ai lea o le tala o le tupe. Aepeitai ua see le vaa i le Faigamalo tausii mea sa faaauau. Ma ua faamalamalama mai i le Malo fou, o le aiaiga lea ua faaogaina o le aiaiga e 105 o le tulafono faavae. O le vaega lea e aiaia ai mea e tutupu i totonu o taimi o faalavelave faafuasei. Sa matou saili lava ina ia manino a o le a foi le tonu e ao ona fai. Ia faapuupuu atu ia se faamatalaga, ina ua faapea mai le fautuaga aemaise o le fautuaga a le Ofisa o le Loia sili, o le 95 e le talafeagai lea, ona e ao ona faataatia le Tala o le tupe i luga o le Laulau a Fono a le Palemene. Aepeitai e le i mafai ona faatino lena tulaga.

Ona fai ai lea o le faaiuga lau Afioga i le Fofoga Fetalai, e ui lava i le matauina foi, e uiga ese lea tulaga lea ua see i ai le faaogaina o tatou tupe. Ae ua manino foi ua tapenaina lava auala e mafai ai ona mautinoa, o le a le tupe, e faatulaga mai e le Ofisa o le tupe. Faamaonia e le Ofisa o le Suetusi ona tuuina atu lea i le Afioga i le Ao Mamalu o le Malo e faapena ona faamaonia. Ma le faamoemoe foi, i se taimi o le a tauaofia ai le Palemene, ona faapena lea ona faataatia na fuafuaga mo le silafia e sui o le atunuu, le faagasologa sa sau ai.

Ma ou te manatu o lea o le a faaiuiu lena faiga, ona faasolo loa lea o le faiga masani, o le tala o le tupe o le tausaga o lo o faagasolo.

Ma atonu o le a mafai ona faataatia mai lipoti e pei ona sa faagaioia ai lo tatou Malo i masina ia e tolu. O Iulai, Aokuso ma Setema.

Lau afioga i le Fofoga Featalai, atonu e taua lava lou ootoo atu o le tulaga lea ina ia manino ai foi ma faamauina i faamaumauga a le Palemene, o ala sa uia i le tapenaga lea.

E malie foi i saunoaga e uiga i tatou Ofisa ma e maufi aemaise le faatinog o le galuega o le faufautua mo le Malo.

O le fautuaga la lea sa taatia mai, e le lelei le 95 i le finagalo lea o le loia sili. Aepeitai e le i manino lelei, i se fautuaga mo le 105, e na o le pau lava le faamaumauga o lo o i ai, e pei o se tulaga lea ua manatu le Ofisa o le Suetusi sili o se auala lea e aupito lelei e faafae ai le faaogaina o a tatou tupe i ia masina e tolu, o Iulai, Aokuso, Setema.

Ou te manatu e na o le pau lava se teuteuga sa fautuaina e le Minisita o tupe ona o lea aiaiga sa faagasolo ai, ia tupe a le Malo, sa faavae i luga o se tala o le tupe mo le 12 masina. I se tau aofai po o le \$800 miliona.

Ona i ai lea o le fautuaga na tuuina mai e le Minisita o tupe, e ao ona fai ia se faiga, e faatulaga ai se vaega e faamuta ai le tupe e faaogaina mo lea vaitaimi. Atonu o le a faamalamalama atili e le Afioga i le Minisita pe a oo i le taimi e tulai mai ai. O lona uiga e fai le cap, ina ia aua nei silia atu le tupe i le tupe ua faatulagaina mai. Ma i le vaai foi i ai i le fua faalemafaufau, o lo o fua i masina e tolu, pe a faapea ua faatusatusa i se aofaiga o se tupe ua faataatia mo le 12 masina. O le toe faatulagaina o le tala o le tupe e pei ona masani ai. Ou te manatu o se galuega sa ave i ai le faamuamua ma le faataua, aemaise foi o lea ua nofoia le Maota o le Atunuu.

Ma ua mafai loa ona faagasolo le tatou galuega, ina ia toe faafai ia le faagaioiga o tupe a le Malo i se tulaga masani, e fesoasoani ai mo i tatou uma. E le gata i le pulega faapea foi i le silasila a sui o le Maota, ae taua foi lea mo le aufaigaluega mo le latou foi pitolaau, o le faatinoina lea o galuega a le Malo.

Ona ou see mai lea lau Afioga i le Fofoga Fetalai i nisi o mataupu sa laga mai, i nisi o Matagaluega o lo o i lalo o lau vaavaaiga.

O le Matagaluega o le Siosiomaga, le Punaoa faale-natura, e pei foi ona masani ai i Paeaiga ua mavae atu, o talosaga lava aemaise o latou taligalu. Na talanoaina foi ia le faataua o le faasao o tatou togatogo. Ia ma galuega foi o lo o fai mo folesi ma le toe totoina o laau ina ia mafai lava ona tatou puipui i lo tatou Siosiomaga aemaise lava o le Osone.

O le mamalu o le Maota, aua o au foi leni sa tulai mai foi i le Matagaluega lea i le Paeaiga talu ai. O le mea moni lava, o le faiga o taligalu i le Nofoaiga ua mavae, sa faalagolago ma faamoemoe i nisi o poloketi tetele po o tupe faafesoasoani. Aua a leai ia vaegatupe, o le mea lava e tua i ai o tupe a tatou lava ia. Ou te manatu i le faaiiuga o le tatou Paeaiga talu ai. Sa saunoa ai lava le Taitai o le Malo i lona taimi i le talosaga mai pea o sui usufono, i mea lava nei o taligalu. Ma faatonuina ai le Minisita o tupe ma le Minisita o Galuega e toe tau sue ane ai ni tupe a tatou lava ia, e tali atu ai i manaoga o lo o saunoa mai ai sui usufono.

I le ofi mai ai la o le tatou Faigamalo fou, atonu e pei foi ona faasilasila atu e nisi o Minisita, o lea faatoa ono (6) vaiaso o le tatou Malo fou. Ma e leai se faatulagaina faapitoa o lo o i ai, mo le vaega leni o taligalu. Ma ou te

manatu o se itu lenei, e ao ona tapena i ai le Matagaluega lenei, ma le fesoasoani a le Ofisa o le tupe, e saili mai ni fesoasoani e faatino ai faamoemoe nei.

E lua lava gaoioiga e fai e tali atu mo le suiga o le tau. O mea e faaitiitia ai le afaina o le siosiomaga, medication. Ma gaoioiga e fai e tali atu ai i suiga o adaptations. O lea la e lavea ai ia a tatou taligalu le gaoioiga lea e fai, o le faatino o le galuega, e pei o taligalu, e tali atu ai i le siisii o le tai ma tulaga lava o lo o aliali mai.

Lau Afioga i le Fofoga Fetalai, o galuega tetele ia o taligalu, o lo o tuufaafeagai lava ma isi manaoga faale-galuega tetele. O aualagalua o aualatetele o auala laupapa, ma tulaga o galuega tetele e pei ona masani ai. Ma o lea e vaavaai i ai le Kapeneta ma le Faigamalo i se faiga e fai o le manino aua e sau pea talosaga. Ona manatu a lea, o fea lava le mea lea e faaputu ai talosaga ia e aumai. Ae o le a foi le faiga o lo o tali atu ai i na talosaga e tuuina mai. Ina ia tuliloa ai le mea lea e saunoa mai ai le Taitai o le Itu Agai, ina ia manino, transparent, talosaga o lo o aumai, faatinoga i le tali atu o le Malo.

O togatogo ma le faasaoina, o le itu taua o lea vaega o le siosiomaga. Ona e fai lava le upu foi lea i togatogo, o togatogo e fau ai eleele fou. Atonu o le isi foi tali atu lea i le suiga o le tau, o le faasao mai o tatou togatogo e faamautu ai le eleele, aemaise i le gataifale.

O a tatou folesi, e i ai nisi o a tatou togalaau tetele i itu eseese o le Atunuu. Ma o le mea moni ua oo le matua o tatou togalaau lea i se tulaga, ua tatau ona fai i ai se tonu ma se faaiuga po o le a le mea e tatau ona fai i ai. Aua o le mafuaaga e ala ai ona toto laau, ina ia maua mai ai se alaoa o le atunuu. Ma out e manatu o le isi itu lea, o le a vaavaai foi i ai lo tatou Faigamalo.

A o le isi itu, o le toe totoina o laau, sa o tatou sau ai, e miliona laau. E taua ma e tatau ona faaauau. ‘

Lau Afioga i le Fofoga Fetalai, o le Matagaluega o Tagata Tafafao mai. O lenei atinae o le atunuu o se vaega tumaoti, o se sector, tatou te malamalama uma i ai i le tele o lona aafia. Ona o le tapunia o femalagaiga po o le faaitiitia ai po o le leai lava o ni malo e malaga mai i lo tatou atunuu. Ua tele le afaina. E i ai nisi o fesoasoani sa faapena ona faasoa foi Paeaiga po o le Nofoaiga a le Malo talu ai, ae o lo o i ai foi fuafuaga a lo tatou Malo fou. I itu e fesoasoani atu ai, i lea foi sector. Aemaise o le vaega lea e fai a latou beach fales. Aua e eseese ituaiga. O le vaega lea e i ai beach fales, ma o lo o i ai ma faletalimalo tetele, e tapenapena ma faasauniuni i se taimi o le a faapena ona mafai ona matala ai ia le tulaga o lo o i ai nei le tapunia o tatou tuaoi, faava o Malo. Ma o lo o faaauau ai pea nisi o aoaoga. E le gata o i latou o lo o galulue ai lava i totonu o le sector lenei, po o le toe aoaoina i nisi o agavaa, e mafai ai ona saili galuega i nisi ituaiga galuega e mafai ona fesoasoani ai i tagata i a latou tupe maua.

O lo o faataua lava ma ua amata ona faatuputupu le faaaogaina o tagata Samoa o tatou Faletalimalo. Aemaise foi i aso malolo faapitoa, o lea tatou te maua, o lo o maua ai nip au, e mafai ai ona o atu aiga e tafafao ma malolo i nofoaga ia. Atonu o se itu lea o lo o mafai ona faatupu lava i totonu o Samoa ia, se fesoasoani mo lea vaega tauatia e o le atunuu, ma tau faagaioi ai lo latou tamaoaiga.

Lau Afioga i le Fofoga Fetalai, sa fesiligia ia nisi o Fonotaga taua. O lea e faamoemoe e tali malo ai ia Samoa, e pei foi na saunoa le Taitai o le Itu Agai. O le tatou fonu ma le EU, ACP. O le isi polokalame lea e fesoasoani tele mo i tatou. Ma o le faia mai o lenei Fonotaga i Samoa nei, e faamauiina ai, 1. Le mafai pea ona faaauauiina ai o lea polokalame fesoasoani a le EU, mo atunuu o Aferika, Kalipiane faapea ma tatou nei i le Pasefika. E taua ai foi le sao o Samoa i le taumafai atu e faaopoopo ma faatosina mai a tatou paaga nei, e ala i le fonu mai i si o tatou atunuu.

E faapena foi i le fonu a Malo o le taupulega, o lo o i ai foi lenei fuafuaga ma sa ave i ai le ofo a lo tatou Malo ma faapena foi ona tatou talimalo ai.

Ona o le tulaga faaletonu lava ma le tulaga maaleale o lo o i ai pea le lalolagi atoa. Ona o le faamai o le Koviti-19 e le o mafai lava ona atoatoa ma maua mai se tonu, pe faapefea ona faatino ia Fonotaga, a o afea e mafai ona faatino ai lenei faamoemoe.

Ou te iloa o Fonotaga o Malo o le Taupulega, ua le mafai foi ona faasolo Fonotaga masani, ma e i ai isi Fonotaga e i luma atu o le isi Fonotaga lea sa faamoemoe mai Samoa. O lea e le i mafai ona faatino. E le mailoa lelei lau afioga, pe o le a tuutuu atu lava i tua ia le faasologa o ia fonu. O le fonu lea a le EU ACP, e le faapea o se fonu e tuufaasolo i le tulaga foi lea, o le amataga lea o le faafouina o le polokalame, ma e taua tele. Ma a faapea e mafai ona faatino lenei fonu, e pei o le taimi lenei o le lalolagi, o le tele o Fonotaga o lo o faatino i luga o upega tafailagi. E le ma iloa foi la, pe onomea ma talafeagai lenei mea mo le tatou fonu, ae o lo o onosaia pea ia talanoaga o lenei faamoemoe.

Lau Afioga i le Fofoga Fetalai, o le isi fesili ona o le Matagaluega a le loia sili, ona o tatou fofoga suesue foi ia o Forensic Pathologist, o lo o i ai nisi o nei tino maliliu o lo o i le falemai o lo o manaomia ni taotoga suesue. Atonu tatou te manatua sa i ai le isi taotoga tele na fesoasoani mai ai fofoga mai Saina, ona e toatele naua ia suesuega sa fai i lenei taimi na malaga mai ai ma fesoasoani mai fofoga Saina a o le taimi lenei, e tolu tino (3) maliliu o lo o faapea ona faatalitali mo suesuega. O le tulaga lea e i ai nei, e i ai le tatou fofoga suesue, ae le i ausia e ia le tulaga lea Forensic Pathologist, ma o lea la e sailiili. 1. Pe mafai ona o mai nisi, e tau lalata mai lava Niu Sila ma Ausetalia. 2. Pe mafai ona i ai se faiga e mafai ona talia i auala faale-tulafono, aua e malolosi lava tulafono e faatino ai ia suesuega nei, e mafai ai ona faia le suesuega e le tatou fofoga, ae supervise mai e se Forensic Pathologist i luga o fesootaiga e-health facilities.

E pei o mea na o lea e tausaili i ai i lenei vaitaimi. E i ai si a tatou fomai, ae le i ausia le laasaga lea, pe o le isi foi avanoa lea lau Afioga i le Soifua Maloloina, e ave ia le tatou fomai lea, se i maua lava le isi ona faailoga lena faaopoopo ona maua ai loa lea o le tatou fomai, e mafai ona faatinoa ia suesuega.

Lau Afioga i le Fofoga Fetalai, ona ou faaiu mai ai lea i le saunoaga matagofie a le Taitai o le Itu Agai. E maua atu lava le suamatamuli o lau afioga e faapea o le Tala o le tupe sa fai o tatou i ai faatasi. E leai se mea o le a matamuli ai fua lau afioga. E pei foi ona fai atu i upu e amta ai le tatou fonotaga lenei. O le tatou galuega lava e tuufaasolo, ua faasolo atu i lenei itu agai atu i le la itu, o lea foi ua toe faasolo mai i inei. O le tatou galuega lava ia, o le galuega lava mo le manuia o le tatou Atunuu.

O mea uma sa saunoa i lau Afioga i le Taitai, o itu taua ia. Ma ou te faafetai i le faasoa mai o lau Afioga e tusa ai foi ma le tele o tausaga sa e tulai mai ai i le foe. Ma le silafia o lena o ia te oe i itu taua e tataua ona taofiofimaui ai, ia so o se Faigamalo.

O le itu lava lea ona o lea tatou te talanoa i le tala o le tupe, e pei o lea o lo maua atu o le faapaleni o le social ma le economic development. Atonu e moni a au, lau afioga, ua saunoa foi i ai nisi o sui usufono i lena itu o le Maota. Ina o i ai se vaaiga, o le tala o le tupe lea, ua lilifa agai i le social development, ae ono le faatauaina le itu o le economic development, po o le tamaoaiga.

Ua ou taofi foi se tasi o saunoaga a le sui o le Maota o faapea mai, o le wealth is health. O le feau a lelei le tamaoaiga e lelei uma lava mea. A tatou fua la i le mea lea e i ai nei le tatou wealth o le feau lea e momoli mai. E le o lelei le tatou wealth. A le o lena, ona tatou fesili lea, pe na o le wealth ea e fofu ai mea ia e tutupu. Pe leai nisi faiga.

Aua e faapena foi le upu e fai i le tulaga tutusa pe o le tulaga faataua o le itupa o tamaitai. Fai mai foi le mau, e iloa lava le atunuu e lelei lona tamaoaiga ua tulaga lelei foi ona tamaitai.

O le isi fua lena.

E eseese lava mea tatou te fuaina ai, po o fea le mea lea e i ai le soifuaga o tagata o le tatou atunuu. O lea e i ai le tatou GDP, na tatou talanoa i le \$100 a le tagata male faasolosolo mai o le faatuputupulaia o le tamaoaiga. O lea ua tatou ausia ai le \$10,000 a le tagata. A tatou talanoa i lena fua, e ese le manaia. E tele le va o le \$100 ma le \$10,000. Ae i ai foi isi fua ia e feagai nei ma tatou, fai mai e a? E mai le tolima (5) o tagata i le toatasi o lo o nofo i le tulaga mativa. One out of every 5 people live in poverty. O fetuunaiga la nei, ou te iloa o lea e feagai ma i tatou, feagai ma Faigamalo. O fea tonu le fua? O le a le fofu? A o le a le gaioiga e fai agai i ai.

Ou te manatu lau Afioga i le Fofoga Fetalai, e sao le faitau, e sao le mau o lo o momoli mai e lena itu. Ae ou te manatu foi pe a tatou fua i le tai \$ miliona lea e lagalaga ai le Maota e fai ma faataitaiga. O le fua lea, o le toe

faafoi atu i tagata o le atunuu o se tupe e faatupu ai foi e latou lava ia o latou aao so latou tamaoaiga. A toatele e e mafai na gaoioi e faatupu le tamaoaiga, e le gata mo i latou, ae a tuufaatasi ua siitia ai le tulaga o le tamaoaiga faitele. O le a ea le mea o le a afaina ai lena mea. Aua po o le a le tatou faitau, ua siisii i luga le taulaga o le tamaoaiga ua lelei fale e nonofo ai tagata, ua aooga a tatou fanau, ma isi mea lelei uma o lo o tutupu. Ae pogisa le tatou vaai i nisi o le atunuu e le o maua le faamanuiaga lena. Pe le o se luitau ea lena mo i tatou o faipule o le atunuu.

Ou te manatu e ese le taua o le tatou faasoa. Ma o le Faigamalo foi lenei, ou te talitonu a faapea e i ai se mea ua sasi, matou te fai atu ua matou sasi, ona toe faasao lea. A i ai foi se fautuaga e lelei ma atoatoa o le a le mea o le a tuua ai. Ae o le faamoemoe lena i lau Afioga i le Fofoga Fetalai, e amata atu ai le matou talifuaaitau i saunoaga matagofie a sui o le Atunuu i luga o le felafolafoaiga i luga o le Tala Autu lenei, tausaga 2021/2022. Ia manuia.

Na faaalua le agaga fiafia o le Maota i le patipati o latou aao i le maea ai o le Saunoaga a le Palemia.

FOFOGA FETALAI: Faamalo saunoa i lau Afioga i le Palemia. Ua amatamea lau Afioga aua le tatou Faigamalo. O lea foi ua e talifuaaitau i le saunoaga a le Taitai o le Itu Agai. O lea foi ua faaali mai lou finagalo i le faamoemoe o le Faigamalo ua i ai nei, aua lava le au i luma o le manuia o le atunuu. Faamalo tanoa faamalo saunoa. O lea foi ua faaali mai le agaga o lau Afioga i le Taitai o le Malo. Ua faafofoga atu le Maota ua faafofoga mai foi le atunuu. Ia o lea foi e manaia le alafua o lea ua taumafai i ai la tatou Faigamalo, aua lava se manuia o le Atunuu. Ae le tuua lava fautuaga i mea lelei. E pei ona fautua mai ai foi le Taitai o le Itu Agai ma lea Itu o le Maota. Ua faamalo saunoa.

O le taimi lenei o le a tuuina atu i lau Afioga i le sui Palemia e talifuaaitau aua foi nisi mataupu sa laga.

Afioga Hon TUALA TEVAGA IOSEFO PONIFASIO (Sui Palemia): E momoli atu le agaga o le faafetai, i lau Afioga i le Fofoga Fetalai o Samoa. E masalo o lenei itula, o lo o i ai nai fesili na tuuina mai e tusa ai foi ma lou tulai atu. E le tele, ae tau ia ina ou faapea atu lau Afioga i le Fofoga Fetalai, ou te fia afea le tulaga o se...aua le tapuaiga a Samoa. Aemaise foi o sau faafetai e fia faaleo i lenei itula o le aso. Aua e fou le sui usufono ma lona tulai mai.

Lau Afioga i le Fofoga Fetalai, ou te tu i liaga ma ou nofo i nofoaga o ee. Ona ou manatua ai le isi fuaaitau a le atunuu, fai mai, e toilalo le vaa e malaga loa. E le taua sasa o le vasa. Tulouna ia le Maota i Tiafau, aua o lele ia malutau e le Fonousu a Samoa. Ua nofoia le upega ua taaligiligia le lupepe. Ua aina foi faleseu ua nofoia tia maualuluga, aua o lea ua afio lau Afioga i

le Palemia. Lau Afioga i le Sao Faapito, Fiame Naomi Mataafa Faumuina Mulinu II. Afifio foi a outou Afioga i Minisita o le Kapeneta, afifio foi Minisita Lagolago o le Malo.

Afio lau Afioga i le Fofoga Fetalai o le Fono faapea le sui Fofoga Fetalai ma le failautusi o le Fono.

Afio lau Afioga i le Taitai o le Itu Agai lau susuga Tuilaepa Fatialofa Auelua Dr. Sailele Malielegaoi. E faapea le sui Taitai o le Vaega Faaupufai e Puipuia Aiatatau a Tagata, lau afioga Fonotoe Lauofo, tainane le afifio o a outou afioga sui filifilia o Palemene o Samoa.

E faapea foi Ofisa sili o Pulega o Matagaluga ma Faalapotopotoga a le Malo ua faatasi mai i le Maota.

Ou te faatulou atu i le Tafatolu o le tatou Faigamalo, lau Afioga i Le Ao mamalu o le Malo, lau Afioga Tuimalealiifano Vaaletoa Sualauvi II ma lau masiofo. Lau Afioga i le Sui o le Fono o Sui Tofia, lau Afioga Le Mamea Tapulesatele Tuiletufuga Ropati Mualia ma lou faletua.

Ou te faatulou foi i le faamasinoga mamalu a Samoa. I le afio o lau Afioga i le Faamasino sili, faamasino sinia, afioga i alii ma tamaitai o le Faamasinoga maualuga, faapea tamaitai ma alii o le Faamasioga Faaitumalo. Afio le Peresetene o le Faamasinoga o Fanua ma Suafa, afifio foi alii ma tamaitai faamasino o le faamasinoga mamalu o le Faamasinoga o Fanua ma Suafa o Samoa.

Ou te faatulou foi i le tapuaiga a Samoa i Tama ma Aiga, o Aiga ma latou Tama, Tumua ma Pule, Ituaa ma Alataua, Aiga i le Tai ma le Vaa o Fonoti.

E le faagaloina le faigamalo a Tutuila ma Manua, Sua ma le Vaifanua, Fofu ma Aitulagi, Saole ma Saleaamua ma le Launiu na Saelua.

Tulouna foi le Motusa i le afio o le Laau na Amotasi, Faatuiolemotu, Tootoo o le Faleula ma Tama a le Manuatele.

E manatua i le loto le tapuaiga a le aufaigaluega paia a le Atua, o Taitai o Ekalesia Kerisiano o auauna a le Atua o lo o tulua ma faafalelemalu i so o se fatafaitaulaga e fia, o lo o punonou ma tatalo i le ao ma le po ma aso uma, sema ni manu aua se manuia o Samoa mo nei ma a taeao ma le lumanai.

Ou te faatalofa atu ma le agaga maualalo. Lau Afioga i le Fofoga Fetalai, ou te fia pai atu i si ou itumalo o Gagaemauga Nu.1. Le matua ia oe Saleaula, aua le afifio o alii e lua, Tautaiiolefue ma Tauiliili, afifio Maopu Fepuleai ma Toiaivao, afifio foi le Aiga Sa Peseta ma le Usoalii, alaalatai lou mamalu Saleaula, lou faletufuga ma lau faatufugaga, o oe o le Pule faavae, o le tufuga ita, o le tufuga toatamai, o oe o le tufuga alofa.

Le afioaga o lealatele e i ai Samalaeulu, Patamea ma Mauga, faapea le nuu a fono o le fuaiala o Tama Suafa. Tulouna Lealatele aua le afifio o Aiga Sa Tuala, afio le Faalagilagi ia Tuala, lau Afioga i le Saoalii o le tootoo o le filemu ma le Aiga Sa Tuala ma lou falesefulu. Afio le Saofetalai lau Afioga Sala ma le Aiga a Sa Sala, ma le falevalu. Alaalatai lo la toalua, le mamalu ia Tevaga ma Vaifale ma upu ia oe Salemuliaga.

Afio le Soomalo ia Lauano ma le Aiga Sa Lauano, le toafia o alii, le suafa Ae, Toleafoa ma Salima, le mamalu o le toafa i le nofo a ituaiga ma le mamalu i le Faleaana.

O paia ia o Lealatele na afua ai se tasi o taeao faitauina o Samoa, taeao o le talalelei ua maualuga ai le Tupua i Malaeola ma Nafoga na iloa ai e Samoa le faailoga o le koluse i le Suafa o le Tama ma le Alo ma le Agaga Paia.

Ou te manatu o le a taoto i le vaomalua le uatea o le tao e le apo aua o ou mamalu Samoa o le tao e apoapogata. A o lenei aso, ua tumu au i le loto faafetai, ua ou fia pese i viiga o le Alii. Fai mai le Fai Salamo o Tavita, “A faasaga ae ou mata i mauga e oo mai ai lou fesoasoani, o lou fesoasoani e oo mai ia Ieova lea, o Ia na faia le lagi ma le lalolagi.”

Lau Afioa i le Fofoga Fetalai, o le manulauti lea e faavae ai le manatu o lou tulai atu i lenei itula, ou te fia momoli le viiga ma le faafetai i le Atua o Ia e ona mea uma, o Ia e toatasi ma Lona finagalo ua tatou fesilafai ai nei i le matagofie o Lona alofa. Fai mai foi le upu, “O e foi e faatuatua ia te Ia ma le loto maualalo, e maua e i latou le filemu ma le togi o le manumalo.” Samoa e, taofi mau lou faatuatua, faamaualaloina o tatou loto e maua ai le filemu, tatou te maua ai foi le togi o le manumalo. E talitonu foi le sui usufono, o a lavasiga o la tatou sailigamalo, e maua lava i lalo malo i le liliuina o le tofa ma le faautaga e pei o tu ma aga faale-atunuu ua tatou masani ai, faatasi ai ma le agaga o le Atua. Se amuia oe Samoa o lo o maua lou toa, ia maua pea lou filemu mai le Alii. E ui i lea, faafetai Samoa mo lau tapuaiga, a o feagai Samoa ma gasegase o malo. Faafetai i la outou tofa ma la outou faautaga ua filifilia ai e lenei Vaega Faaupufai o le Faatuatua i le Atua Samoa ua Tasi e taitaia le Malo i lenei foi vaitau. E ui ina lutia i puava i le tele o luitau na feagai ai ma le tau faatuina o le Malo, o lea lava ua mapu i Fagalele i le alofa ma le agalelei o le Atua. Faafetai. E mau pea la outou toovae, filemu le atunuu. Seanoa le agalelei o le Atua e le tau i manu lo tatou faamoemoe.

O le tulai mai o le Palemia ma lana Kapeneta ma le faigamalo, a, ua lava tapena e taitai Samoa mo se lumanai manuia. Aumai la outou faatuatua, tatou galulue faatasi, ia maua e tatou le agaga o le galulue feoeoeai ma le fegalegaleai. O lona agaga, o le agaga lea o le Atua na auala mai i lana toe upu mulimuli ae le i afio o Ia i le lagi, “Ia outou fealofani.”

E momoli atu foi le agaga faafetai i le aufaigaluega a le Atua, malo tatalo, faafetai mo a outou timaiga ma le folafolaina o le finagalo o le Atua ua fai lea ma taiala o le soifua faaleagaga o le atunuu.

Ia, si ou itumalo o Gagaemauga Nu.1, ou te fia faafetai atu, o lo outou filifilia lea o Tuala e fai ma o outou sui i le Maota Fono o Samoa, se i fai so tatou sao aua upufai o malo se i saili so tatou manuia aua le atiaeina o le itumalo aemaise Ekalesia ma aiga taitoatasi. Faafetai i lo outou talia o lau faatalaauula atu i le taimi a o feagai le atunuu ma le faiga filifiliga po o le faiga palota. Ia, o ai le tagata ua outou manatu ane ai? A o ai se failoto pe a na ou tagi atu ae outou le tali mai?

Ou te fia faafetai faapitoa i faafeagaiga taulagi uma i totonu o si ou itumalo, ua tali le Atua i la outou tapuaiga tatalo na filemu ai le tatou filifiliga. Ae a? Lea ua tu malo.

FOFOGA FETALAI: Mea sili faafetai o lea ua oo lau faafetai. Ia, aua foi le aufaigaluega paia a le Atua. E faamalulu atu foi i lau Afioga i le Sui Palemia mo le folasaga, ia ona ua tatou oo i le tatou malologa, e tatau foi ona tatou sailiili malosi ona toe faaauau ai lea o lau saunoaga pe a tatou taliu mai i le tatou malologa.

O le mea lea e faasilasila atu o le a tolopoina nei galuega a le Fono Aoaofaitulafono mo lana malologa e 15 minute. Ua faataatiaese nei galuega a le Maota Fono mo lana malologa mo le 15 minute. Faafetai.

Na faataatiaese Taulumaga a le Fono Aoaofaitulafono mo lana malologa i le itula e 8:35 ma toe faaauau i le itula e 9:05 i le po.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2021/2022.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono.

E faataatiaese tatou Taulumaga o lo o saunoa le Afioga i le Sui Palemia, e talifuaitau foi i mataupu sa laga e sui usufono mamalu o le Maota.

O le mea lea ou te tapa lau Afioga i le Sui Palemia mo le faaauauina o lau saunoaga.

Afioga Hon TUALA TEVAGA IOSEFO PONIFASIO: Lau Afioga i le Fofoga Fetalai, e malolo la tatou fonotaga o ave lau faafetai i si o matou itumalo. E manatu foi o le a le toe umi se faamatalaga i lenei itula. E ava atu foi ona ua umi le aso. O lea lau Afioga, e momoli la matou faafetai i le matou itumalo i le latou finagalo autasi. O le latou finagalo autasi, e momoli lo outou sui usufono i le Vaega Faaupufai o le Faatuatua i le Atua Samoa ua Tasi. Lea ua tatou soosootauau ai nei ma nisi foi o toa o le atunuu, ua tini ai lau o le faamoemoe, ia viia le Atua aua o Lona finagalo lea mo i tatou.

Lou itumalo e, faamalo le onosai. Ua le toe mamao se taimi ona tatou feiloai lea e tapena le tatou itumalo aua lona atinae ma ana polokalame faataatia mo se tatou manuia. Ua ou iloa o tatou manaoga, o le a ou le talatalaina atu i lenei itula, ae aua le popole, ona o lea ua tatou nonofo i le nofoa o le faimea, o se ala lea e maua ai se avanoa e ave se tuualalo i le Kapeneta mo tatou manaoga.

Toe tasi lau faafetai lau Afioga i le Fofoga Fetalai. E le mafai ona faagalo nai o matou aiga i Samoa nei. E tele nuu i Samoa o lo o i ai o matou aiga sa tapuaia, a o alofaiva foi lou tagata i le faiga palota.

Ou te fia faafetai foi i ou aiga i atunuu mamao, aemaise i ou uso ma tuafafine i Niu Sila, uo ma e masani aua la outou lagolago. O la outou tatalo ma la outou fautua pea mai ma la outou faalototele a na leai la outou tuualalo, o le tuualalo alofa, semeamanu e le taunuu le tatou faamoemoe. Ia o lau pule lea.

Ia, si ou toalua ma si au fanau, e ao pea ona fai atu se tala, leaga e le te i te i tu lou tagata i inei. Sa tatou vaavaalua ma tatou galulue. Faafetai i lo outou tali i mea tiga ma faigata, aso uma, taimi uma, la outou lagolago malosi. E tolu Paeaiga o tatou taumafai mai. Ia, ou te manatua pea se tasi o saunoaga a le Palemia i se faatalatalanoaga foi ma le aufaasalalau. Fai mai, toetiiti lava tatou tuai. O le manatu lea. Ou te masalo a na le maua sou avanoa i le Paeaiga lenei, ia, o lau toe taumafai lea. Ae faafetai i le Atua i Lona alofa i si o tatou aiga.

Lau Afioga i le Fofoga Fetalai, atonu o se avanoa lea se i ou afe ane ai se i tali nisi foi o fesili na tuuina mai e tusa o le Matagaluega o lo o ou galue ai nei o le Matagaluega lea o Lafoga ma Tiute po o Tupe Maua ma Tiute. O fesili nei na tuu mai, o le a le umi foi se tali e avatu. O le fesili muamua, o le tulaga lea i laina lanumeamata po o le green lane, ia, o le laina samasama, laina lanumoana ma le mumu. Ia masalo a alu le po nei o ou taumafai e faamalamalama le tulaga lea, ia ailoga o le a umi lava se taimi. Ae tau ia ina ou faapea atu, o le taimi nei o lo o tapena le Afioga i le Tamaitai Pule aemaise foi o le Matagaluega i se latou auiliiliga o tulaga o mea tau green lane ma mea faapena, a o lo o i ai polokalame ua uma ona faataoto ma faamauina, o le aoga lea o nei laina ua taua. O nei lane, o le lanumeamata, o le faailoga lea ua atoatoa uma faamaumauga, ua leai se mea e masalomia i le tulaga foi o le faamomoli po o personal effects ua tuu mai. O lea na mafua ai le faavaveina po o le faatelevaveina i fafo e aunoa ma se suesuega. A o isi uma lanu e i ai le lanu mumu, o lanu ia, e i ai foi o latou mafuaaga ma o latou aoga. E le faapea... e o lava i ai suesuega pe a faapea e i ai foliga vaaia o ni mea o lo o masalomia. E le o se mea faigofie ona ou tautala ai, leaga o le tulaga lea, e tatau foi ona i ai le silafia po o le iloa faapitoa aua le faatinoina o le matafaioi lea, e pei o ni metotia.

O le manatu ua faaleoina mai e se tasi foi o sui usufono e faapea e aveese le lanumeamata lea, ou te faamalulu atu, e lelei lava ona taatia mai leaga o le lanumeamata e i ai lona aoga. Ua uma foi ona faamauina i totonu o le system lea o lo o taua o le ASYCUDA system po o se polokalame faacomputer o lo o faaogaina ina ia televave ai le kiliaina o oloa faapea foi ma faamomoli. Aua le popole o lo o tapena lelei ma mataituina tulaga o laina nei aua le saogalemu o a outou oloa e aumai aemaise le aufaipisinisi aemaise

foi le tulaga o le amiotonu o lo o faapea ona matou taumafai i ai ma le Matagaluega.

O le tulaga i lafoga mo faifeau, ua faamauina nei mo le iloiloga a le Malo o lo o galulue ai le Matagaluega ma le Ofisa o le Loia Sili aua se fautuaga e tuuina atu i le Malo mo le toe iloiloina o lenei Tulafono. O lo o tapena nei se faiga faavae e faatino ai ni suiga e alagatau ona fai, aua se tapenaga maeaea o le tatou Malo ma ni suiga talafeagai o le a faapea ona fai.

O le tulaga i le X-ray container scanner, po o le faata lea e faata ai containers tetele. Ua maua i le saunoaga a le Afioga ia Faimalo, e sao lelei, e saolele le saunoaga, o lea ua uma ona alu le tender muamua, o lea ua maea, ua le faaogaina po ua cancel lenei tender ona e le i meet ina pe le i ausia foi e ni tauofoga le tulaga o le vaega patino po o le technical experts o le tatou masini. O lea na toe re-tender ai, o le taimi la lenei o lea ua tuuina mai i luma o le Kapeneta mo se faaiuga. O lea foi ua silasila totoa i ai le Kapeneta ona o le tulaga foi lele, e lua lava mea o lo o fesiligia i le taimi lenei, ona o lea o lo o faapea mai le tender, o le loli foi lea, e alu atu le container ona tu lea ae alu le loli e taamilo. O le isi ituaiga scanner lea o lo o i ai, o le scanner foi lele e fix, lona uiga e le migoi ae sau le container ma le loli ona alu ai lea i lalo. O le tulaga la lea o lo o silasila totoa i ai le Kapeneta i le taimi lenei, aua se faaiuga. Ae i ai le manatu, ia ua le toe mamao se taimi ona maua lea o lea faamamaavega ia aua foi le faafaigofieina o le galuega a le Matagaluega ma le faatelevaveina o tiute e tuuina mai.

O se tasi foi o fesili e faatatau lea i le tatou TIMS po o le Tax Invoice Monitoring System. I le taimi nei o lo o faagasolo pea feutanaiga aemaise foi o faatalalanoaga ma le Tamaitai Pule ma le Matagaluega, o lo o ave i ai le faamuamua i le taimi lenei. O lo o faapea foi ona aumai ni talosaga po o ni submissions mai le Chamber of Commerce ia ma nisi foi paaga o lo o fia fai so latou sao i le tulaga o le TIMS. O le manatu ua ou vaai foi i ai lou tagata, e i ai ona tulaga e aoga ai le TIMS, e i ai foi ona popolega i le isi tulaga. A o le taimi lenei o lo o vaavaai lelei i ai ina ia aua ne i faaogasese lea polokalame a ia fai ia i ai sona aoga mo le lumanai o Samoa.

E faaiu sau faamatalaga leaga o lea na taua le \$51 miliona. Lau Afioga i le Fofoga Fetalai, e vave lava lau tali i le taimi lenei. E pei ona maua i le saunoaga foi aemaise le faatulagaina o le paketi, o lo o lelei le aoina o tatou tupe maua.

Lau Afioga i le Fofoga Fetalai, e i ai le manatu o le a i ai le tupe faasilia i le aoina o tatou tupe e maua lea i lenei tausaga faapea foi le tausaga o i luma. Mo le silafia e le tatou Palemene aemaise le faafofoga mai o Samoa, o lo o fai lava sina tele o tupe o lo o i tua, o tupe e le o aoina. Tau ina ou faapea atu, e le laitiiti, e fai lava sina tele. A galulue le Matagaluega e ao mai tupe na i totonu, e i ai lou talitonu o le a leai se tatou popole i le \$51 miliona. Tau ina ou faaata atu faapena, ae le mafai ona ou tau atua se aofaiga, ae o lea o

le a ave i ai le faamuamua a lenei Matagaluega, aua le aoina o aitalafu aemaise foi tupe o tiute ua tuai ona totogi.

Ia o se faamatalaga lea e tusa ai ma le faafesili. O le naunautaiga lava ia au nei aemaise foi le Matagaluega ia lelei le faapolokalameina o galuega a le Matagaluega aua le laalaa i luma ia lava ma lelei le aoina o tupe maua, aemaise foi le faamalosiaiuina o le aufaigaluega e build le capacity i totonu o le Matagaluega ia lava lelei ma lelei le auaunaga ma faapea ona tele ai tatou tupe ao.

Lau Afioga i le Fofoga Fetalai, ia ua tele lava le fia maua o se manatu i lenei aso. Ua ou manatu e ao ona tuuavanoa i lau Afioga ona o le tele o galuega o lo o fia faagasolo i lau polokalame i se taimi o totoe. Ae o le matou tatalo, sagai ane ai o le tai ia manuteleina ou faiva, aua le taitaiga o le Maota Fono o Samoa. Ia maai lau pelu o le amiotonu, ia manifi le lau ae pupulu le au aua le folauga a le Palemene i Lona Paeaiga XVII ua seei ai nei lau Afioga i le Nofoa aua Samoa.

Alofagia e le Atua Samoa, manuia le tapuaiga a le atunuu, manuia le Palemia le Kapeneta ma le faigamalo, manuia le Fonousu a le Palemene o Samoa. Soifua.

Na faaaliala le agaga fiafia o le Maota i le patipati o latou aao i le maea ai o le Saunoaga Talifuaitau a le Afioga i le Minisita mo Tupe Maua.

FOFOGA FETALAI: Ia ua faamalo saunoa, malo foi tanoa i lau Afioga i le Sui Palemia, aemaise foi o le faamalamalamaina o nisi o tuualalo foi sa tuuina atu i lau Matagaluega o Tupe Maua aemaise foi o le faapupulaina o tapenaga a le Matagaluega aua lava le sailiga o le tamaoaiga aua lava le tatou Tala o le Tupe e pei ona i ai i le Maota. O le mea lea, malo faafetai. Ua faafofoga foi lou itumalo, o lea foi ua e faapai i ai ma auauna a le Atua, malo faafetai. Ou te talitonu lava o lea foi ua faafofoga ma le totoa le tatou Maota aua le gasologa o galuega aemaise le agai i luma o le Matagaluega o lo o vaai e lau Afioga. Malo faafetai.

Ou te iloa o le taimi lenei o lea ua oo atu i lau Afioga i le Minisita mo Faatoaga ma Faigafaiva, ia o lou avanoa lenei e saunoa mai.

Susuga Hon LAAULI LEUATEA POLATAIVAO FOSI: Fafetai tele i lau Afioga i le Fofoga o le Fono mo lou avanoa e faaleoina ai foi se manatu o lenei Matagaluega ua tofia ai au e le tatou Malo. Ou te taofi o le a ee tupu ia oe le Atua e ou le mana ma le malosi uma lava, le Atua le Tama, le Atua le Alo ma le Atua le Agaga Sa. Lou agaga e, ia e faamanu atu i le Alii, lou agaga e, ia aua ne i galo se mea e tasi o Ana meaalofa.

Tulouna ia le Maota i Tiafau, tulouna le tupua ma ona tapuafanua, o malae foi ma ona leoamalae, aua o le Maota fai mai e na ai le tupu pe a maua lona nofoaga. Fai mai o le ti'a na fafau e o tatou tuua ma matua e velo ai ti'a o le

tautiaga aua Samoa ma lona lumanai. Ona ou faatulou lea aua le paia maualuga o le Maota i lenei itula o le taeao na liugalua. O lea ua faliu le la i lona tauafiafi, ua gase foi lana taamilosaga aua le aso ma le faamoemoe. Ona manatu lea o le a ou le toe asaina le vai na pisi, ae tau ia ina ou asaasa i tai tafola, e fesootai ai vai mai mauga, ma vai mai vasa, o galuega a le Atua Soifua, o le ou le ana, le malosi ma Samoa atoa.

Tulouna oe Samoa o le ao mamala, o le i'a iviivia e leai se potu, leai se vave na te toe suia ou ala, e tumau. Aiga ma latou Tama, Tama ma o latou Aiga, le usoga ia Tumua ma Pule, Itua'u ma Alataua, Aiga i le Tai ma le Vaa o Fonoti. O ou mamalu na faaleaganuu mai ona ao seia oo i ona i'u. Tulouna mamalu faale-Atua, le Atua na emo ai le malama i Sa'ua, ae fai mai le malelega a le Malietoa, "Ua uma ao ma iu o Malo, omai e ave le mutia lea e toto ae faatalitali i lagi se ao o lou Malo. Lou taeao ma lou malae lena lau Afioga i le Fofoga Fetalai ma isi taeao e fia o Samoa. O lea ua malama i ulugalua Samoa, tatou ave le faamanu ia te Ia, o Ia tatou maua ai Ao ma Iu o Malo.

Tulouna le paia o le tatou Malo i ona tulaga faalupe i le Afio o Lau Afioga i le Ao mamalu o le Malo, ia te oe le Tuiaana ma lau masiofo. Tulouna le Sui o le Fono a Sui Tofia ma lou faletua. Tulouna le ituvai o le Faamasinoga, aua le Afio o lau Afioga i le Faamasino Sili ma le Ofisa o le Faamasinoga Maualuga a Samoa lau Afioga i le Peresetene ma le Itulau o le Faamasinoga.

Faatulou atu lea i lau Afioga i le Fofoga Fetalai e te Afio i lou Nofoa vaevaeloloa ma e faalogologo ia te oe le Palemene o Samoa.

Lau Afioga i le Sao Faapito, lau Afioga i le Palemia filifilia na tusi aao i ai Samoa. Lau Afioga i le Saofetalai, lau Afioga i le Sui Palemia ma sui usufono mamalu uma o le Kapeneta, aemaise ia lo tatou aiga o le Faatuatua i le Atua ia Samoa ua Tasi. O le Faigamalo foi lea a Samoa.

E manatu foi o lea e malu ia le aitu o le aoa aua le Afio lau Afioga i le Taitai o le Itu Agai, lau Susuga Tuilaepa Auelua Fatialofa Neioti Aiono Sailele Malielegaoi, o oe lava sa e tu i matagiolo, aua le tautuaina o Samoa i futia ua sola ma aso ua alu.

Lau Afioga i le Sui Taitai, o oe o le amomua o le Tuiatua, aemaise le paia maualuga o Tupu ma Ee, tamalii ma failauga, faletua ma tausii, sa'ao ma tamaitai o outou lava o tootoouli ma fuefuesina o Samoa tulouna ia. Tulouna le ee tapuai o le paia ma le mamalu o Samoa ia te outou o Faaluuluga o Matagaluega ma Faalapotopotoga o Vaega Tumaoti o le tatou Malo. O outou lava na fai mai i le fuifui aua le tautuaina o Samoa ma le tatou Malo. Le paia maualuga o Samoa o faafofoga ma taputapuai mai ao usu le Fonousu a Samoa, se o faatu le faga talatala le laafa ma le lafala, ma fulifuli faalau mamafa le tofa ma le faautautaga, le malelega ma le Afioga e lufilufi ai manu o Samoa nei ma a taeao.

Le faafofoga tapuai mai a so o se Samoa i le lalolagi atoa tafa e fia o le kelope o lo o outou tatalo ma outou tautua aitaumalele ai, aua si o tatou

atunuu ma aiga. Ou te taofi o lenei afiafi o lea ua maea ona sausau le fuesina, ma ua atoa na asaasa le fueafa, ma ua talatala fulu ai lupe o le soaga, aua tuleiga ma saunoaga o lea ua opea i le Maota i lenei itula o le afiafi. Ae e le mafai ona alu loa leaga e faigata o lea e tapuai Samoa.

O lenei afiafi ua ou tulai ma le ava ma le faaaloalo tele, e momoli ai le agaga faafetai tele, i lenei itu o le malu i lau Afioga i le Taitai lau Susuga Tuilaepa aua o oe o le Alo o Malietoa, ona e tele taeao e le lautaeao ae tautala aso le aso. I lau faalelegafulu o lea ua logo a logo i na matou faalogologo ma le matou matau, tuleiga ma saunoaga o lea ua opea i le Maota, e matimati ai ia so matou vaivai ia ma so matou faatauvaa. Ou te taofi e tu manu ae le tu logologo, e pala foi maa, ae e le pala tala. E tele fetu o le lagi ae ua iloa fetu tai. E tele laau o le vao, ae ua iloa ia laau taua. Loloto foi le moana, ae ua iloa ala o ia.

Faafetai atu i lou agaga faaaloalo, leaga e le laa loa le savali, ma le matau i futia ua sola ma aso ua alu i lou soifua auaua aemaise o lau tautua mo Samoa. E le mafai e tatau lava ona fai atu se upu faafetai, faafetai mo mea uma i ou faiva alofilima ma ou faiva na laulausasa, e le mafai e upu ma tala ona faamatala. Ae o le agaga e sau i le fatu ma le loto, e tumau pea le agaga o le faaaloalo atu, leaga o oe sa e tu e taitai Samoa i nei tausaga e tele aemaise ia le lauililiuina o le tamaoiga o le atunuu ma le auauauina o maa aua se lumanai manuia o nei ma a taeao.

Ou lagona lau Afioga i le Fofoga Fetalai e ese lava le taimi o le tagata, ese le taimi o le Atua. Tatou agai mai ina ua maea le faiga filifiliga a Samoa sa o tatou o i tai o taafiliga. Sa o tatou o ua toso lava ia le aulapauta ma le aulapatai a le tagata lava ia. Sa o tatou finau uma, sa o tatou aumai avatu ma tu, sa faapena ona o tatou saili ia le manumalo. Sa o tatou tilotilo ai lau Afioga i le Fofoga Fetalai ua amata ona manunu le oopopo. O upu ma tala, le tu ma le aga ma le tatou faaaloalo masani.

O lenei taeao i lau Afioga i le Fofoga Fetalai ia i le Atua pea Lona Viiga, Lona Faamanu ma Lona Faafetai. Ou te taofi, o a mea uma na o tatou asaasa mai ai, faafetai i le Atua, Viia Lona alofa ma Lona agalelei, ua o tatou taunuu i le taunuuga filemu ma le taunuuga e maua ai le filemu o le loto, taitai ai Samoa mo le lumanai. Ao le fesili lava lea lau Afioga i le Fofoga Fetalai, o ai le pule? O ai le malosi? E tasi lava, o le Atua e ou le Mana ma le malosi uma lava. O le Atua na taitai maia le tatou faigamalaga na asaina le gasu o le taeao e o tatou matua. E le galo, silasila i le Maota lau Afioga i le Fofoga Fetalai, silasila i mauili o tatou matua mai i le uluai Ao o le Malo, mai i le uluai Palemia o le Malo, mai i le uluai Fofoga Fetalai, mai i le uluai Palemene o Samoa, e leai se mauili e le o i totonu o le Maota lenei.

Lau Afioga i le Fofoga Fetalai, o i lea ou te talitonu o i lea ua ae ai le faamanusina aua ia le tatou Nofoaiga lenei. O se Nofoaiga uiga ese lenei, ma o lea e molimau uma i tuleiga ma saunoaga ia sa o tatou faalogologo i ai i tuleiga na momoli mai i le tofa ma le faautautaga a le Maota, aisea? Leaga

sa o tatou lagona uma manatu faale-tagata. Ae ou te taofi ma lou agaga faaaloalo, lau Afioga i le Fofoga Fetalai e le i tuulafoaiina tatou e le tatalo a lo tatou atunuu aemaise le aufaigaluega tofofi a le Atua i ona tulaga faalupe.

O lea e momoli ai le agaga faafetai tele le paia o Samoa ma le tapuaiga, o sa ma faiga o Samoa e leai lava se isi e toli niu fitifiti e malu ai le atunuu, ao lau pule ma lau faasinomaga ua aumai i le Nofoaiga lenei e fai ai ia o matou tagata e taitaiina le Malo lenei, ia Viia le Atua. E le o se matou malosī, e le o se matou malosī e le o se matou poto foi, o le finagalo o le Atua. O le mea lea le paia e ma le maualuga o le Maota ua uma ona fai ia o tatou upu, e le toe saili ia lo tatou ala i Malo. E le toe sii ia se matalalaga, e le mala ese i ina, mala ese i inei. O le tatou filifiliga i le Nofoaiga lenei, o le tatou Maota e fau faatasi ma o le vaa o Samoa, o le vaa e fau tele.

O le tulai atu o lenei Faigamalo fou e tasi lava ia le fatu ma le loto, ia manuia Samoa. E leai foi se isi e utuvai tofo, leaga o le afu o le atunuu o le mea oona. Ma o le mea e tatou te lulu, o le mea foi lena e tatou te selesele, ae o le tatalo faatauanau ia o lea ua fai ia tatou tala. Tatou sunui ala o taua, ua uma tai o taafiliga. Ua lava taimi o pogisa ma finauga sa fai, aua o le tilotilo mai o Samoa o lo o taape i le lalolagi atoa, a toa le tai i le Maota, ua toa Samoa. O tatou e fai ma faata, ma vaaiga i le savaliga a tupulaga o lo o lalovaoa o le atunuu e agai mai i le Maota lenei. E le fai mo tatou le Maota lenei, e alu aso e sau aso. Ma e fai mai foi ia tupulaga o le atunuu latou te tauave le tatou galuega ae tautala aso, i tau mai tupulaga fai mai faapea ua sae le sa o Samoa i le Nofoaiga XVII.

Ae viia le Atua o lo o tapuaaoina pea ia lo tatou ola i mea uma ua na tapenaina. E momoli lau faafetai lau Afioga i le Palemia, i lou faatuatuaina o au e filifilia au i le Matagaluega lenei Faatoaga ma Faigafaiva, ou te tulai e tauave le galuega mo le tamaoaiga o le atunuu. O le Matagaluega o lea e tatou te talitonu o lea e i ai le fatu o le atunuu. O i o lo o taoto ai le atinaeina o Samoa i ona tulaga lautetele, aua e au i le tauola e au i le fagota. E au i suafa e au i eleele o lau pule lena. Ma o i ina e toto ai ia le toala faaautama i le atinaeina o le atunuu.

O lau mau faavae ina ua atinae ia lo tatou atunuu i le 1960, o le uluai Tala o le Tupe sa faatupe ai ia le Malo o Samoa, o le 70% o fua o le laueleele. E leai lava se isi mea. O le 70%, 80% o le economically development o Samoa, o fua o le laueleele, ma e leai lava se isi mea e tatou te tua i ai, e leai nisi mea po o ni auro po o ni ario po o se suauu po o ni minerale po o se isi lava mea e...

O le faasinomaga o lou tofi aua e leai lava se Samoa e leai sona tuapapa ma sona tuamaota ma sona tualaoa e le tua i ai. Ae o le toe faatulai mai o le fafagu o le Faigamalo lenei, se i o tatou toe foi tasi lava i tua i le mea na o tatou ola mai ai. Se i tatou o e toe lagalaga le mea o lea tatou te talitonu i ai. O i e i ai le atinae gafataulimaina tutusa o le Atunuu atoa. Pe e te atamai pe e te le atamai pe e te maualuga po o ai. E tutusa uma le aufaifaatoaga ma le

aufaifaiva i le silasila a le atunuu. O le pine faamau a o tatou matua na fai, tau mai ia ia tatou i le 1970 i le 1980, na aumai ai mea nei tatou te nonofo ma tatou. O le tatou 1 sene sa i ai, o le ata o le niu, po o le popo. O le tatou 2 sene, o le ata o le koko. O le tatou 5 sene o le ata o le fale. O le tatou 10 sene o le ata o le talo. O le tatou 20 sene o le ata o le ulu. O le tatou 50 sene o le ata o le fai.

Lau Afioga i le Fofoga Fetalai, o le faamanatu lena i le tatou Maota. O i, o le tatou tamaoaiga moni lea, o fua o faaeleeleaga o le atunuu. O faigafaiva o le Atuu aua ia ma mea uma ua foi e le Atua i ogasami tatou te ola ai.

E momoli lau faafetai tele i le sa avea ma Minisita o le Kapeneta e tauave le Nofoa lea ua ou toe nofo atu ai, ina ua ou faamavae 2017. Na ou alu ai e tali moliaga e faasaga ia te au. E le i faia le iuga o le faamasinoga ae ua ou faamavae, e manumanu i le tofiga a lau Afioga i le alo o le Malietoa. Ou te le manao ou te toe nofo i i, ae upuia lou taimi. Na ou alu ai e sailimalo. E faafetai i le Atua, o lea ua ou toe tu atu, ina ua filifili le Sao Faapito ou te toe foi mai iinei.

E faafetai Lopao, faafetai mo galuega uma e le lilo e le lanu lau tautua na faaauau ai le galuega. Sa tauavameaina mai lena taimi. O a ni mea ua lelei, viia le Alii, o a ni foi ni lape, tatou faasolo mo le agai i luma.

Ua tulei saunoa le paia ma le mamalu maualuga o le Maota i le tele ma le anoanoai o outou finagalo o lea ua uma ona faamaumauina uma lava i i. Le taua o le mataupu lena o le fesoasoani tuusao i le aufaifaatoaga uma a Samoa. O lea ua outou faafofoga foi i le matau o lea sa vavao ai foi i lena aso atoa ma le aso ananafi. O fea le mea e ave i ai le tai miliona lea sa folafola i le atunuu.

O lau tatalo i le Palemia ma le Kapeneta, faamuamua lava faatoaga, faamuamua lava faatoaga a le aufaifaatoaga ma le aufaifaiva i totonu o nuu ma itumalo.

Ona o i latou ia e pitosili ona manaomia le fesoasoani. O le tama ma tina ma le fanau. O le nuu o le itumalo ma le ekalesia, o ai vae ma lima? E amata mai lava i le aiga. O ou tagatanuu o le atunuu. O lau aganuu ma lau faakerisiano o le tatou matafaioi tauavae faatasi lea. Ave sao le fesoasoani i lima o le aufaifaatoaga. Aua o lea ua uma ona ou taumafai e faamatalatala atu.

O le a faataatia faiga faavae e fai ai le tupe lea. E ofaga uma i ai le nuu ma le itumalo. E filitagaga po o a mea e tatau ona faamuamua. E faafetai i lau Afioga Faimalotoa, leaga o oe lea sa Minisita i le Matagaluega lea ua seei atu ai Leota Laki. Sa e faataunuuina le poloketi lea o nuu, aemaise foi o fono, village councils. O le taua lena, a, o le faaauuina lena o le poloketi lea. E tatau ona i ai le village council latou te talanoaina le poloketi lena. E fesili po o ai. E i ai faifeau, e i ai tulatoa o le nuu, e i ai tulafale o le nuu, e i ai tupulaga talavou, tama tina, e soalaupule i latou po o le a le mea e tatau ona fai. O faiga faavae ia o lea ua faataoto atu.

Le Afioga i le Minisita o Tupe ma le afioga ia Leota o ia tonu e ona le Matagaluega. A o le matafaioi a au ma le Matagaluega, o le o atu e faatau mea ia o le a toto ma fua mai e le aufaifaatoaga uma.

O aso ia, na ou ola ae lava o fai faatoaga a lou aiga. Ma o le faatoaga na ou ola ai. O faatoaga na ou potou ai ma ou faigaluega ai. O popo, koko, fai, ufi, taamu, so o se mea. A manao nei lava le faifaatoaga e uu le \$10,000, e uu nei lava. Aisea? O lea sa o tatou vaai i ai. O le a le mea a Siamani na fai i Samoa? Na latou fai ai le WESTEC lea, tatou tilotilo i le mea na oo i ai le WESTEC, povi, puua, moa, talo, fai, ulu so o se mea, koko, mea uma na ave i atunuu i fafo e numera tasi. O Peretania na oo i ai le koko a Samoa ma so o se mea. A e a le mea na tupu? Ua tatou faatamala, o lea lava la e tau aloalo le vaa o le Esetete i le taimi lenei. Ua matua gaulua lava, ae le mafai ona aveesea ai le talitonuga o i e tataua ona tatou toe tepa i ai o faatoaga. E leaga foi o i e taavale ai le tamaoaiga tutusa e pei ona ou fai atu.

E faafetai o lea ua le alala mai le afioga ia Sala Fata Pinati o le galuega lea na fai i le fale lea na faatau i Niu Sila. A foi o le uiga lena o le tatou galuega e amata mea, faaiu mea ma faatupu. O le fale lena, o lea o le a amata ai le tatou mea lea na tatou talanoa ai nei, o le Export Authority. E taulamua ai le Malo, e o e fesoasoani ia i latou ia e exporter i le taimi lenei. Ne i matau mai se isi faapea o le a o atu le Malo lola uma tagata na. E leai e le o le uiga lena o le mataupu lea e fai. E o atu le Malo e tietie ai tagata na i luga o le Malo, government to Government level approached ma le Malo i le Malo. E ese lava le alu a le exporter ia e alu na o ia, aua e alu atu lavelavea solo i le mau red tapes o biosecurity ma quarantine o le lalolagi atoa. Ae a alu atu le oloa a Samoa, i va lelei ma va nonofo o feagaiga faava o Malo, e matala faitotoa. O le agaga moni lena na manatu ai le Faigamalo, e toe faatu le mea lenei o le Export Authority. Ma nisi o tatou oloa, mo le silafia o le tatou SROS o le galuega foi na amatamea le tatou Faigamalo lena. Na tatou tapena uma ai le falaoamata ulu, o le suauu popo, o le suauu avoka, ma le tele o nisi o mea. E ifo uma lava i i, ua uma foi ona faatulaga e lena itu o le tatou Malae. O le commercial arm lea. O le faataunuuina la o lona faatinoina i le tulaga o le commercialize, ua manatu le Faigamalo o i, e faataunuu uma ai mea ia na tatou talanoa ai. E fau ai oloa fou, e uiga i fua o faaeleeleaga a le aufaifaatoaga. E gaosi mai ai le tatou ulu maua ai le tatou falaoa mata ulu. O le tele o isi mea ua uma ona faatulaga, ua i ai foi le tulaga ua siitia le auauna a le SROS i le faiga o isi suesuega, suesue ai nisi o fualaa faasaina i totonu o le Atunuu. E suesue ai nisi o tulaga ua leva ona tausaili ni fofo, suesue uma ai laulaau a Samoa, po o le a le laulaau e sili ona maua ai ni mea e tau o le medication ma mea uma mo le atunuu. O suesuega na o la ua fai. A o le isi suesuega fou la ua faatulaga. O le suesuega e suesue ai lou DNA. O le suesuega o lou DNA leaga ua tele ina tatou vevesi i le sue o suli moni o le faamasinoga. E le toe pepelo la se isi i i, tulou foi le mamalu o le atunuu, e i ai lava isi e finau vale. E tiga lava ona le pai ae o lava e fusu. Ae a maua

lau test, ona manino lava lea o le suesuega lea. O se itu sili ona taua mo le faasologa mo le lumanai.

O le tatou vai, o isi tulaga uma o lo o i ai mea tetele e tatau ona tatou faatinoina, ina ia maua ai le lumanai manuia i nisi o aseta a lo tatou Malo.

O le tatou talo, e sao a outou saunoaga, o le tatou talo o la e sioki. Ona o le mea lava lenei o le tatou o pogisa. E le o talanoa le aufaifaatoaga, e alu lava le tagata ia toto le mea e manao ai. A matua, matua faatasi, a motu, motu faatasi, a ua le fai se aiaiga lelei, ina ia mafai ona fetaliai le faatulagaina o le maketi. Ua toe fesili mai maketi i fafo, ua leai se mea. E pei la o le taimi lenei. O lea ua faatulagaina e le Matagaluega le database atoa lava, e lesitala uma ai le aufaifaatoaga uma a Samoa. O talo, fai, ufi, koko, popo, mea uma ia iloa e le Matagaluega o le a le sao a le itumalo. O le faataitaiga o Vaimauga 1, o le a le sao o Vaimauga 1 i lenei masina? E fia se talo e mafai ona outou fai maia? E fia se ulu e mafai ona outou fai maia? E fia se koko? E fia se popo? O i ina, e mafai ai e le Matagaluega ona faasoaso manaoga o le maketi lea e aumai.

Talanoa i le aufaifaatoaga ma talanoa i le mea e sue ai maketi. Ona le pine lea ona faasolosolo ma tulitulimatagau oka uma, ia aua ne i o tatou toe sioki. O lea e molimau mai i le taimi lenei, ua matua leai lava se tatou talo. Leai ma se talo ona o le mea lenei, e tuli lava le manu a le faifaatoaga ia. Ae a fai o le tulaga lea o le a i ai le poloketi lea, le tai miliona lea. E lesitala uma lava faifaatoaga o lou itumalo, ma aumai a latou lipoti o le mea lea o lea e mafai ona fai. O lau saofaga lea, mo le atunuu i le masina lea, ina ia matuai malamalama lelei saofaga a lea itumalo ma lea itumalo ona tuufaatasi lea. Ona maua loa lea o le tatou sao, e saili ai maketi mo le lumanai. E oo foi i le tulaga i tatou exporters ia, o tatou exporters la e i ai i le taimi lenei, e alu lava le tagata ia. E uma ona faatautalo iinei ona o atu lea fusu i le maketi i Niu Sila. Aua foi ua alu i le mea foi lea ua sue lava le mea e ola ai le Initia ia. Uma ona alu atu le isi tipi le isi, ua alu atu ua alu i lalo le tau a le isi. O le a le mea e tupu, e fafa i le aufaifaatoaga. Ae a tulai le Malo i le mea lea, e regulate le tau e alu ai le exporter e faatau mai le talo a le tagata, ma regulate le exporter lea e alu ai e faatau lana talo i fafo. We don't need to fight ourselves, e tatou te o tatou te finau ma isi atunuu. A lea tou te saunoa mai i le talo Fiti, talo a Toga talo a Niue. E le mafai ona tatou toe o atu tatou toe finau tatou ia tatou.

O le mataupu lea, i tatou talo o le Samoa tasi o le Samoa lua ma le talo vave. O talo na o lea e faapea ua numera tasi i le taimi lenei. Ae le o i ai lava lona atoatoa. A o la e galulue malosi pea le Ofisa o Faatoaga e toe fai nisi o suesuega. Ina ia tatou toe maua pea le aano ma le tulaga sagatonu o le tatou talo inaia mafai ona taulia. A lea e molimau nisi, e tumau lava le lelei o le talo a Fiti.

Ona o le tulaga o la e lelei le lagolago a le Malo i le aufaifaatoaga ma le au exporters. O le atoaga lenei o le galuega o lea e taumafai e faatino atu i le

taimi lenei. O le tulaga i tatou manuainiu, e sao outou e le o faatamala le mea lena, ma e le fiu foi. O le taimi lenei o lo o alu le stimulus package e tufa fua ai le niu ma tufa fua ai le koko i le taimi lenei o le Koviti-19 i mea ia e faasolo. O le talitonuga o a tatou mataiai na, its our long term crops. E uma le 15 tausaga o tatou faaaogaina le niu e tasi. Uma foi le 10 ma ona tupu tausaga o tatou tau lava le koko e tasi, ae tatau ona tatou agai i le isi tulaga lea ua faatulaga atu nei e le tatou Malo o le commercialization and mechanization. Ua le tutusa le malosi o le tatou aufaifaatoaga, o lea ua outou vaai ua fiafia lava le tupulaga e oso i le vaalele alu i fafo, saili le tupe i le fesoasoani lea e maua mai tatou RSE, ua latou le gafataulimaina le mea lenei o le o e toe lalafo le vao ma fai galuega mamafa. O lea ua iinei le polokalame a Saina lea ua iinei, ae faafetai ai foi i le Malo o Saina i lea polokalame na ou alu o phase 3 a o lea ua ou foi mai ua phase 5. O lea e faaoga ai masini, fetalaisa ma mea ituaiga mea eseese e mafai ai ona toto fualaauaina mo le atunuu, ia tatou maua ni fualaauaina felesi ma fualaauaina e fai ai tatou meaai. A o le faalautelega la, o lea o le a toe aumai i luga le poloketi lenei na ou faia i lou taimi a o ou Minisita i le 2016, o le a toe talosaga e toe aumai masini, lea foi na folafola atu muamua. E aumai ai masini e fesoasoani mo le aufaifaatoaga e atiae ai tatou nuu ma afioaga. Ua tatou vaavaai i le taimi lenei e faigata tele. Samoa has never been proud before. O lena ua outou vaai i ai e tatau. A faapea o le faataitaiga e 10 eka, faavagavaga lelei le 10 eka, ona avatu lea o masini ma tagata vaevae auala, fai poloka tai 2 eka faataatia alapaipa, fai uma le tulaga inter-commercial formulation e mafai ai ona uma le olaga lenei na o le fefulifuliai lava o le palapala e le faifaatoaga ma suisui ana meatoto i totonu o poloka nei. O le faataatiaga lena o le laasaga fou lea tatou te naunau tatou te oo i ai, ma le faanaunautaiga o le lifiina lena o tatou mai faatoaga sa tatou i ai foi i ia aso, i le auala sili ona tatou mautinoa o le a lelei ai le tamaoaiaga o si o tatou atunuu.

O lo o i ai le polokalame lea e faagasolo nei sa amata o SACEP a o lea ua faaalu o le SAFPRO. Ia, ua tuuina mai le faamatalaga e le tatou Matagaluega le toatele foi o le tatou atunuu i Upolu ma Savaii lea ua outou resitala ai, ma e lagona le agaga faafetai e faamauina ai pea le faafetai i le World Bank ma le IFAD. E \$23 miliona Amerika lenei atinae taua o lea e faasolo i le taimi lenei, e resitala uma ai le aufaifaatoaga e o ifo e tapena mea ia. Ma ua fetau tonu lava le taimi lenei ma le tatou taumafaiga lea e tau fai atu, ina ia mafai ona maua le faamamaavega ia aua e le gata ina toto a ia maua seleni. O le fatu o le mea lea, ia aua ne i toe omai tatou aufaatoaga toe nonofo i le maketi, ona amata loa lea ona faaputupu tautalo, alu ifo alu ifo lava i luga ua \$10 a ua 40 talo. O le a le mea e tupu? E le toe i ai ma se isi e toe fia faifaatoaga. A o le tiute o le tatou Malo, o le vaavaai pea ma tilotilo pea i le auala e faafaigofie ai le galuega m oi latou e aupito sili ona manaomia le fesoasoani a le aufaifaatoaga. Le aufaifaiva, faamalo faafetai. Ou te iloa tasi lenei itutino o le Matagaluega e sili ona taua foi i le tatou atunuu. Ma e

i ai le talitonuga, o lau lea tilotilo, e le tatau ona pupunia e le isi fetu le isi fetu. Ua ou sauni foi e ave le talosaga i le Palemia ma le Kapeneta, ua tatau ona faatumaoti le Ofisa o Faigafaiva, ina ia mafai ona matua tulai mai lenei foi itutino o le tatou Malo, e tu matila le aufaifaiva i totonu o le tatou atunuu. O lena ua outou vaai i ai nisi foi o vaafagota, ia ma le tele o nisi o fuafuaga o lea ua faataatia mo fale i'a ma mea ua leva foi ona fuafua mai foi i lou taimi a o ou i ai i i. O le agaga lava, ina ia faatuputeleina le au fai alia ma le aufai vaafagota i totonu o le tatou atunuu.

O le tulaga i le tatou WESTEC, ia o lena e silafia e le mamalu o le tatou Maota, e le o mate le faatuatua i le taumafaiga o le tatou faalapotopotoga lenei o le WESTEC. O lea lava ou te tatalo i le tatou faigamalo, afai lava tatou te ave se tupe itiiti, e le mafai ona fua mai se galuega e taumafai, o lea ou te tatalo, a lava ma totoe... ona faapena lea ona fua mai foi ma lelei...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, pe maua se avanoa faamolemole...

FOFOGA FETALAI: Se i fai se malologa a lau Afioga i le Minisita ae tulai mai le Afioga i le Sui Taitai.

Tofa Hon Lauofo Fonotoe Nuafesili Pierre Lauofo: Ou te tulai atu ai, e lei i ai se manatu e vaelupeina le saunoaga a le sui usufono mamalu le Afioga i le Minisita le saunoaga faaalualu ma le matagofie. Ua ou matau atu ua ta le 10 i le tatou taimi malolo, ioe, ua tautulemoe foi. Ae lau Afioga, ona o lea faatoa e see ese lava ma le polokalame foi lea poloketi taua lea o le SAFPRM, a o lea foi sa e taua le export authority. O lea e matau atu o lea foi e i ai le vaega o le SAFPRM o lo o fesoasoani i le maketiina o tatou oloa i fafo, o lea la sa mafua ai ona ou fesili i le tulaga lea pe le o lava le poloketi lea e fesoasoani mo le faatuaina atu ma le auina atu o le tatou oloa i fafo nai lo le tau faatu fua o le export authority. Pei o le mea lea na ou fesili atu ai faamolemole semeamanu o lea e i ai le poloketi lea.

Susuga Hon Laauli Leuatea Polataivao Fosi: Ia, taatia mai. Ou te iloa lava e taua lau tuualalo. Ioe, e tuufaatasi lava le tulaga lena o le faamoemoe. Ioe. E le toe faia se matagaluega fou o la e i ai sectors i totonu o le Matagaluega o Faatoaga. Na o le sui lava o le igoa ma ave latou matafaioi e fetai ma le mataupu lea e taumafai atu.

Lau Afioga ne i laaloa lau... Faafetai.

FOFOGA FETALAI: Ou te vaelupeina le saunoaga matagofie a lau Afioga i le Minisita o Faatoaga ma Faigafaiva. Talu ai ua oo i le tatou taimi manava e tusa o le lafo ua faamaonia. Ia talosia ia i le alofa o le Atua le aso

a taeao mo le faaauauina o lau saunoaga ma le tatou galuega ona faaauau ai lea o lau saunoaga.

Ae manatu le Nofoa, ua tatau ona tatou malolo i lenei afiafi tatou sailiili malosi mo le taeao o muamua, toe faaauau le galuega na filifilia ai tatou e le atunuu pe a tusa ma le finagalo alofa o le tatou Matai Sili. Faamalo le onosai faamalo foi le faapalepale, ua tatou taunuu i le siui o galuega o lenei aso a o lo o maualuga pea le alofa taumulimuli o le Atua ia i tatou uma. Ou te talitonu o lo o faapena foi le tapuaiga mamalu a le atunuu.

E momoli atu ai le faafetai ma le faamalo a le Nofoa i le maualuga o le Maota, i le afio o lau Afioga i le Tamaitai Palemia, lau Afioga i le Sui Palemia, le paia i Minisita o le Kapeneta ae a Minisita Lagolago. E faapea foi lea itu o le Maota i le afio o le Afioga i le Taitai o le Itu Agai ma le mamalu o sui usufono o le Palemene. Faamalo le usufono faamalo le onosai.

E momoli foi le faamalo ma le faafetai i sui usufono uma sa sausaunoa i lenei aso aemaise le Afioga i le Taitai ma le Sui Taitai o le Itu Agai, ia ua faafofoga le Maota ma Samoa, ma e talitonu o lo outou sao taua i le taumafaiga ma le uunaia o le tatou galuega, aemaise o fautuaga mo le alofaiva o le tatou faigamalo. Malo tapena malo saunoa.

E fia momoli foi se faafetai i le tapuaiga a Le Ao o le Malo ma le Masiofo, le Sui o le Fono a Sui Tofia ma le faletua, le Faamasino Sili ma le mamalu o le Faamasinoga faapea foi faauluuluga o Ekalesia Kerisiano uma i Samoa ma le aufaigaluega faauuina o le talalelei.

Le tapuaiga a le atunuu i ona mamalu faaleaganuu, o Aiga ma Tama, Tama ma Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti. Ua faafetai tele Samoa i la outou tapuaiga, ua faaiuina ma le manuia le alofaiva o lau Palemene i lenei aso, ona o le mana o lau tatalo ma lau tapuaiga. Alofa faamagalalo se gagana ua sala a le Palemene.

Ou te faamalulu atu foi i le paia o le Palemene, afai ua sala se gagana a le Nofoa i le faafoeina o tatou taualumaga i lenei aso, ia alofa ma faamagalalo le Fofoga Fetalai, tatou taufai tatalo i le alofa o le Atua, ia momoli atu le soifua ma le ola i le aso a taeao e toe faaauau ai le tatou galuega. O le auaunaga faifaipea a le malu o le Malo, le Pulega o le Tinei Mu ma Faalavelave Tutupu Faafuasei, le 2AP, le Matagaluega o le Soifua Maloloina ma le Koluse Mumu, faamalo faafetai i le tautuaina o lau Palemene. Ia faamanuia tele le Atua ia te outou uma. Ia alofagia e le Atua faiga malologa a Samoa i lenei po, ia puipui foi e Lona agalelei le talaaa atu le paia o le Palemene i lenei afiafi.

Ae tatou te le i tolopo, ou te talosaga atu i lau Afioga i le Sui Fofoga Fetalai e te saunia se tatou tatalo e faaiu ai le tatou Fono.

Na tolopo Tausalumaga a le Fono Aoao Faitulafono i le itula e 10:08 i le po seia aulia le itula e 9:00 i le taeao o le aso Lulu, 22 Setema 2021.